



(Thomas Trier Hansen, Timo Abrahamsen, Gerth B. Lyngø)

AALAJANGIINEQ

7. september 2012
Sagsnr. 2012-066079
Dok. Nr. 1007711

”Tasiilami inissiat qulit”

Kommuneqarfik Sermersuup (matuma kingorna maalaaruteqartup) neqerooruteqartitsinissamut allakkat, 15. november 2011-meersut aqutugalugit Tasiilami inissiat qulit sananeqarnissaat tamanut ammasumik suliariumannittussarsiuppai. Sanaartugassani suliassat tallimanut avillugit neqerooruteqartitsivigineqartup.

Suliassani immikkoortoq ataaseq arlallilluunniit neqeroorfigineqarsinnaapput. Akikinnerpaamik akeqartitsinissaq tunniussinissamut piumasaqaataavoq.

Neqerooruteqarnissamut 28. februar 2012 nal. 10 killigitinneqarpoq, tassanissaarlu suliariumannittussarsiussilluni ataatsimiititsisoqarpoq.

13. april 2012-imi maalaaruteqartoq maalaarutigineqartumit ilisimatinneqarpoq, maalaarutigineqartut pillugit isumaqatiginninniarnernik aallartitsisoqassanngitsaq, illuatungaani, tassalu *Entrepreneur Z*-imit, suliassanut tamanut ataatsimut akikinnerusunik neqerooruteqartoqarmat. Aammattaaq allassimavoq, maalaarutigineqartup maalaaruteqartup neqeroorutaa naapertuutinningsutut isumaqarfiggaa.

9. maj 2012-imi tunniussineq pillugu aalajangiinermut naammagittaalliummik maalaaruteqartarfik tigusaqarpoq. Naammagittaalliummi allassimavoq, sanaartornermi neqerooruteqartitsisarneq pillugu Inatsisartut inatsisaanni nr. 11-mi, 2. december 2009-meersumi, kingusinnerusukkat allannguuteqartinneqartumi § 30 naapertorlugu maalaarut atuuttussanngortinneqassasoq naammagittaalliortoq qinnuteqartoq, taamatullu taarsiissutissanik akiliisussanngortitsisoqarnissaa piumasarineqarluni.

6. juni 2012-imi maalaaruteqartarfik aalajangerpoq, naammagittaalliuut atuuttussanngortinneqassanngitsaq. Taamaattumik maalaaruteqartup piumasaqaataa 1 atorunnaarpoq. Matuma kingorna maalaaruteqartarfiup maalaaruteqartup piumasaqaatai uku suliarisussanngorpai:

- 1) Atorunnaarpoq.
- 2) Maalaaruteqartarfiup maluginiassavaa, maalaarutigineqartup suliassanut tamanut *Entrepreneur Z*-ip neqeroorutaanik ataatsimoortunik akuersinermigut, neqerooruteqartarnermut inatsimmi § 7, imm. 3 aamma § 14 saneqqussimmamagu, neqeroorutit ataatsimoortut neqerooruteqartitsinermut allakkiami piffissaliussaasut iluanni tiguneqarsimanninnerat apeqqutaatinnagu.

Postboks 909
3900 Nuuk
Tlf. (+299) 34 50 00
Fax (+299) 34 54 10
E-mail: iaan@nanoq.gl
www.nanoq.gl

- 3) Maalaaruteqartarfiup maluginiassavaa, maalaarutigineqartup suliassanut tamanut *Entreprenør Z*-ip neqeroorutaanik ataatsimoortunik akuersinermigut, neqerooruteqartarnermut inatsimmi § 7, imm. 3 aamma § 14 saneqqussimmamagu, *Entreprenør Z*-ip neqeroorutaani suliassamut A-mut neqeroorutip kisimi atuarneqarnera apeqqutaatinnagu.
- 4) Maalaaruteqartarfiup maluginiassavaa, *Entreprenør Z*-ip suliassamut A-mut neqeroorutaa piumasaqaatinut naleqqutinngimmat, taamaattumillu *Entreprenør Z*-ip suliassaq A-mut neqeroorutaa akuerineqarsinnaanngitsutut maalaarutigineqartup isumaqarfiginngimmagu, tassani agguaassinissamut allattuiffik 2-2-mi suliassat taaneqartut ilaatinneqanngimmata.
- 5) Maalaaruteqartarfiup maluginiassavaa, maalaarutigineqartup neqeroorutaata naleqqutinngitsutut nalunaarutigineratigut neqerooruteqartarnermut inatsimmi § 7, imm. 3 saneqqussimmamagu, neqerooruteqartitsinermut najoqqutassat malillugit maalaaruteqartup suliassaq A-mut neqeroorummi agguaassinissamut allattuiffik 2-2-mi suliassat taaneqartut ilanngussimmamagit.
- 6) Piumasaqaat 5)-imut tapertaritillugu maalaaruteqartarfiup maluginiassavaa, maalaaruteqartup neqeroorutaata naleqqutinngitsutut nalunaarutigineratigut neqerooruteqartarnermut inatsimmi § 7, imm. 3 saneqqussimmamagu, neqerooruteqarnissamut najoqqutassani agguaassinissamut allattuiffimmi 2-2-mi suliassat taaneqartut suliassamut A-mut ilaanngitsut ersarissumik allassimannngimmat, aammalu agguaassinissamut allattuiffimmi 2-2-mi suliassat taaneqartut suliassamut A-mut ilaanissaat kissaatigineqarsimanngippat maalaarutigineqartup tassunga tunngasortai maalaaruteqartup neqeroorutaanut ilaatinngitsoorsimasinnaagaluarai, taamaalillunilu maalaaruteqartup neqeroorutaa 1.031.000 koruuninik ilanngarlugu 6.743.000 koruuninngortissinnaasimagaluarlugu.
- 7) Maalaaruteqartarfiup suliassamut A-mut isumaqatigiissutip *Entreprenør Z*-imut tunniunneqarnissaanik maalaarutigineqartup aalajangiinera atorunaarsissavaa.
- 8) 3.071.313,46 koruuninik, maalaaruteqartup akiliisitsinissamik nalunaaruteqarneraniit suliamut ernianik nalinginnaasunik tapeqartinneqartunik maalaarutigineqartoq naammagittaalluuteqartumut akiliinissamut pisussaaffilerneqassaaq, tassungalugu taarsiullugu maalaaruteqartarfiup naliliinera malillugu aningaasat amerlassusilerneqartut ikinnerusinnaallutik.
- 9) Maalaaruteqartarfiup maluginiassavaa, *Entreprenør Z*-ip suliassamut A-mut neqeroorutaa maalaarutigineqartup akuerisinnaanngimmagu, *Entreprenør Z*-ip neqeroorummik tunniussinerani pisortanut akiitsunik akiligassanngortinneqarsimasunik soqannginneranut uppersaatinik saqqummiussisoqarsimannngimmat.
- 10) Maalaaruteqartarfiup maluginiassavaa, *Entreprenør Z*-ip suliassamut A-mut neqeroorutaa maalaarutigineqartup akuerisinnaanngimmagu, *Entre-*

preņor Z-ip neqeroorummik tunniussinermini pisortanut akiitsoqangaat-siarnera pissutigalugu, aammalu neqeroorummik tunniussinissamut sioqqullugu piffissaalluarallartillugu tamatumunnga taartaasinnaasumik akilersuinissamut isumaqatigiissuteqarsimanngimmat.

- 11) Maalaaruteqartarfiup maluginiassavaa, maalaarutigineqartoq neqerooruteqartarnermut inatsimmi § 7, imm. 3 uniorlugu iliuuseqarsimammat, *Entrepreņor* Z-ip eqqartuussissuserisua aalajangersimasoq maalaarutigineqartumut inatsisitigut siunnersortitut neqeroorutininik nalilersuinermi peqataasimammat.

Maalaarutigineqartoq piumasaqarpoq, piumasaqaatit 2)-miit 11)-mut akuerineqassanngitsut, taakkunani unioqutitsisoqarsimanngimmat pineqaatissiissutissanik aalajangersaasoqarsinnaanngimmat.

Naammassinnissimanissamut soqutigisanut maleruagassat malillugit taarsiissutissatut piumasaqaatigineqartut maalaaruteqartumit imatut naatsorsorneqarput:

Aki neqeroorutaasoq	7.774.000,00 kr.
Agguaanermut allattuiffik A malillugu saniatigut suliassaasinnaasut	-82.100,00 kr.
Agguaanermut allattuiffik "T"	-207.500,00 kr.
Suliassap akia	7.484.400,00 kr.
Suliassami aningaasartuutit	-6.997.483,00 kr.
Suliassami sinneqartoorutit	486.917,00 kr.
Atortut nassiunneri/ pilersitsinermut aningaasartuutit	410.000,00 kr.
Attartorneq/ atortuni erniarititat	1.396.892,00 kr.
Aqutsinermut akiliutit	107.889,80 kr.
Taarsiissutissat, suliamut aningaasartuutissat ilanngunnagit	2.401.698,46 kr.
Neqerooruteqartitsisarnermut Maalaaruteqartarfimmut aningaasartuutit	77.740,00 kr.
Suliamut tunngatillugu nammineerluni aningaasartuutit:	
Qaammatini tallimani najukkami aningaasartuutinut akiliutit (10 % à 288.400,00)	28.840,00
Piffissaq atugaq <i>NM</i> (nal. ak. 119 à 510,00)	60.690,00
Assigiinngitsunut aningaasartuutit (biilit, allaffimmi atortut, oqarasuaat il.il.)	<u>2.345,00</u>
Suliamut tunngatillugu nammineerluni aningaasartuutit, katillugit	91.875,00 kr.
Tasiilami niuerfimmi annaasat (taakkunannga sinneqartoorutit amerlassusii)	500.000,00 kr.
Taarsiissutissat, suliamut aningaasartuutit ilanngunnagit	3.071.313,46 kr.

Isuqaqatigiissusiornissamut soqutigisani annaasassat maalaaruteqartup imatut naatsorsorpai:

Neqeroorusiorneq:	
Najukkami aningaasartuutitut akiliutit (57.680,00-it 40 %-iat)	23.075,00
Piffissaq atugaq (nal. ak. 65 á 510,00)	33.150,00
Assigiinngitsunut aningaasartuutit (oqarasuaat, allaffimmi atortut)	<u>900,00</u>
Neqeroorusiorneq, katillugit	57.125,00 kr.
Neqerooruteqartitsisarnermut Maalaaruteqartarfimmut aningaasartuutit	77.740,00 kr.
Suliamut tunngatillugu nammineerluni aningaasartuutit:	
Qaammatini tallimani najukkami aningaasartuutitut akiliutit (10 % á 288.400,00)	28.840,00
Piffissaq atugaq NM (nal. ak. 119 á 510,00)	60.690,00
Assigiinngitsunut aningaasartuutit (biilit, allaffimmi atortut, oqarasuaat)	<u>2.345,00</u>
Suliamut tunngatillugu nammineerluni aningaasartuutit, katillugit	91.875,00 kr.
Taarsiissutissat, suliamut aningaasartuutit ilanngunnagit	<u>226.740,00 kr.</u>

Suliami pissutsinut nassuiaatit ersarinnerusut

Inissiat qulit sananeqarnissaannut atatillugu pilersaarusiart neqerooruteqarnissamut najoqqutassat suliffeqarfinit assigiinngitsunit marlunnit suliarineqarput. *Siunnersorti R* 'inissiat qulit' pillugit pilersaarusiartuuvog neqerooruteqarnissamullu najoqqutassiortuulluni, kiisalu *Siunnersorti S* 'kuuffeqarfik pingarneq' pillugu pilersaarusiartuuvog neqerooruteqarnissamullu najoqqutassiortuulluni.

Neqerooruteqarnissamut najoqqutassat tamarmiusut *Siunnersorti R*-ip nittartaaganut www.konsulent-r.gl-imut 16. januar 2012-imi ikkunneqarpoq. Neqerooruteqarnissamut najoqqutassani, 15. november 2011-mik ullulernerqartuni, allasimavoq, tassani suliasat immikkoortut tallimat pineqartut:

- A: Sanaartorfissagissaaneq betonilerinerlu
- B: Qarmaaneq, sananeq (saffiorneq ilanngullugu), pequsiorneq qalissialersuinerlu
- C: Qalipaaneq
- D: VVS-ilerineq
- E: Innaallagisserineq

Suliasat immikkoortut B, C aamma E suliami matumani nalilersuinerlut isumaqanngillat.

Aammattaaq neqerooruteqarnermi allakkiami allasimavoq:

”...

Sanaartugassat neqerooruteqarnissamut najoqqutassiaq manna naapertorlugu neqerooruteqarfigineqassapput:

1. Neqerooruteqarnissamut allakkiaq manna.
2. SB (piumasaqaatit immikkut ittut), 15. november 2011-imeersut.
3. SA I (suliassanut nassuiaatit immikkut ittut)
4. SA II (taamaallaat kuuffeqarfimmut pingaarnermut suliassanut nassuiaatit immikkut ittut, *Siunnersorti S*), 15. november 2011-imeersut.
5. SB-mut ilanngussat 1-7.
6. Titartakkat aammalu titartakkat agguarnerinut 15. november 2011-imeersoq.
7. Titartakkanut allattuiffik 15. november 2011-imeersoq naapertorlugu titartakkat.
8. Neqeroorutinut agguaanermullu allattuiffik 15. november 2011-imeersoq.

...

Quppernerit iluarsiiisutaasut digitaliusut www.konsulent-r.gl-imi pissarsiari-neqarsinnaassapput.

Neqeroorutit marlunngorlugit naqitat, SB-mi imm. 5.3 naapertorlugu immersorneqarsimasut, allakkat puuinut matoqqasunut ikillugit, suliffeqarfiup aqqanik atsiorlugit tunniunneqassapput, imatut nassuiaaserlugit: "Suliariumannittussarsiuussineq, Tasiilami inissiat qulit".

...

Nalornilluni apeqquteqartoqassappat allakkatigut saaffigineqqusisoqarpoq, taakkulu kingusinnerpaamik **Marlunngornermi 14. februar 2012**-imi Nuummi *Siunnersorti R*-imit tiguneqarsimassapput.

..."

Immikkut ittumik piumasaqaatini, 15. november 2011-meersuni suliassanut tamanut tunngatillugu ilaatigut allassimavoq:

"...

Illut nalinginnaasumik qaliaat qalliusigaasarput kiisalu toqqaviini betoniusuni naqqup ataata pukkitsup silaannarissakkap qilaavatigut betoninik kipparissunik natiligaasarput.

Illut saavisa taluisalu saarnge qisunnik ammoortunik qalligaasarpoq, kiisalu qalissialikkamik qaliligaasarlutik.

Tamatuma saniatigut sanaartorfissagissaasoqartarpoq, taakkununga kuuffik pingaarneq, kuuffimmut aqqusersuutit, kiassaateqarfimmit pioreersumit ungasianiit kiassarnermik pilersuineq, imeq, innaallagialaq, aqqusineq, biilit unittarfii, kussernit pisinnaallu aqqutaat ilaatinneqartarlutik.

...

Suliassat 01. maj 2012-imiit 15. august 2013-imut ingerlanneqartussat tamarmik suliassanut ukununnga agguarneqarput:

- Suliassaq A Sanaartorfissagissaaneq betonilerinerlu
- Suliassaq B Qarmaaneq, sananeq (saffiugassat ilanngullugit, qalialersuineq, pequsiorneq natilersuinerlu)
- Suliassaq C Qalipaaneq
- Suliassaq D Vvs-ilerineq
- Suliassaq E Innaallagissersuineq

...

2.2 Isumaqatigiissutaasunik allanngineq kiisalu SB (piumasaqaatit immikkut ittut) matumaniittut isigissanngikkaanni, suliassat tamarmik nassuiaatit titartakkallu il.il., matuma kinguliani allassimasut naa-pertorlugit ingerlanneqassapput:

2.2.1 SA I "Tasiilami inissiat qulit sananeqarnissaannut sulinissamut nassuiaatit immikkut ittut – SA 15. november 2011-meersoq – tassunga titartakkat allattorsimaffianni, 15. november 2011-meersumi titartakkat aalajangersimasut.

2.1.2 SA-II Tasiilami inissianut qulinut kuuffik pingaarneq, novembarip ulluisa 15-anneersoq, kiisalu titartakkat allattorsimaffianni titartakkat taaneqartut

...

3.1 Suliassaq A:

Suliassami suliassat, SB-mi aamma SA-mi nassuiarneqartut tamarmik pineqarput

- 101 Inissianut qulinut qaartiterineq, assaaneq nunagissaanerlu SA I imm. 03
- 102 Kuuffimmut pingaarnerinnarmut qaartiterineq, assaaneq SA II imm. 02
nunagissaanerlu
- 103 Betonilerineq aamma jernbetonilerineq SA I imm. 07
- 104 Suliffeqarfik, tak. TAG, AP 95 pillugu ilanngussaq 3 aamma SB.

Sanatitsisoq imminut pisinnaatippoq, pos. 102-p ataani suliassanik tamakkii-sumik ilaannaasumillu piiaanissamut.

...

3.5 Suliassaq D:

Suliassami suliassat, SB-mi aamma SA-mi nassuiarneqartut tamarmik pineqarput

- 401 Inissianut qulinut kuuffilerineq SA I imm. 04
- 402 Kuuffimmut pingaarnerinnarmut qaartiterineq, assaaneq SA II imm.03
nunagissaanerlu
- 403 Imerk pilersuineq SA I imm.06
- 404 Illup iluani imermut igitassamut kuuffiit SA I imm.18
- 405 Imermut nillertumut kissartumullu atortulersuutit kiisalu SA I imm.19
perusuersartarfiit

406 Qitiusumik kiassaateqarfik	SA I imm.20
407 Silaannarissaatilerineq	SA I imm.21
408 Teknikkimut atortulersuutininik oqorsaaneq	SA I imm.23
409 Suliffeqarfik, tak. TAG, AP 95 pillugu ilanngussaq 3 aamma SB	

Sanatitsisoq imminut pisinnaatippoq, pos. 402-p ataani suliassanik tamakkiisumik ilaannaasumillu piaanissamut.

...

5. ISUMAQATIGIISSUTINUT TUNNGAVIUSUT (AP 95-imi imm. A pillugu)

5.1 Sanaartugassat (AP 95 § 1, imm. 1)

Suliassat tamarmik sanaartugassanut tunngasuupput.

5.2 Pisortat suliassaataat

Suliassat tamarmik AP-mi pisortat suliassaataannut aalajangersakkanut tunngasuupput.

5.3 Neqerooriaaseq (AP 95 § 2, imm. 6 aamma 7 aamma § 3, imm. 3 aamma 4 pillugit)

Neqeroorutit agguassinerillu allattorsimaffinni tunniunneqartuni immikkoortunik tamanik immersuinnikkut neqeroorutit saqqummiunneqassapput.

5.3.1 Neqeroorutininik naliliineq (AP 95 § 2, imm. 6 aamma 7 pillugit)

Naliliinermi neqeroorutit tiguneqartut tunngavigineqassapput. Pissutsit uku ilaatigut atuutsinneqassapput:

- Neqeroorutininik assersuussinermi neqeroorutip aningaasartaa-sa inernerit katinneqartarput – Allattuiffik T aamma agguassinerit allattorsimaffianni B-mi, pequsiortunut, akitsuinerit ilanngullugit tunngavigineqassapput.
- Akit neqeroorutaasut pisarnertut misissorneqassapput, nalorngisuteqarfiusinnaasullu akii aalajangerneqassapput.

...

5.3.4 Neqeroorutit naligiitsitat.

Neqerooruteqartup suliassat arlallit ataatsimut tunniunneqarnerini akit appartinnissaannik neqerooruteqarnissamik kissaateqarpat, tamanna allakkami malinnaatitami nalunaarutigineqassaaq, suliassat pineqartut kiisalu appaatissat amerlassusissaat taallugit. Akikillisaatissat agguassinissamut allattuiffimmi immikkoortut tamarmiusut procentinngorlugit annertoqatigiinnik agguarneqarnerisigut ilanngaaticigineqassapput.

Neqerooruteqartut akinik allanik neqerooruteqarnissamik kissaa-teqarpata, tamanna allakkami malinnaatitami nalunaarutigine-

qassaaq, agguassinissamut allattuiffimmi immikkoortut pineqartut taallugit. Kiisalu allatoortumik neqerooruteqarneq nassuiaasiorneqassaaq.

...

5.7.5 Pisortanut akiitsut

Neqerooruteqartoq ilaatinneqarniarluni Akileraaruseriffimmiit nalunaarummik, neqerooruteqartup pisortanut akiligassanngortitanik akiitsoqannginneranut tunngasumik tunniussissaaq.

...”

Suliassanut nassuiaatini immikkut ittuni (SA I), 15. november 2011-mi ullulerneqartumi ilaatigut imatut allassimasoqarpoq:

”...

IMAI

...

03. Assaaneq, nunamik qaartiterineq nunagissaanerlu	03.1 – 03.5
04. Kuuffilerineq	04.1 – 04.4

...

03. QAARTITERINEQ, ASSAANEQ AAMMALU NUNAGISSAANEQ QAJANNAALLISAANERLU

...

03.2 SULIASSAP ANNERTUSSUSIA

03.2.1 Suliassami nunagissaanerit qaartiterinerillu illunut, pilersuinermit aqqusersuutitut, aqqusinernut pisuinnarnullu aqqusinernut pisariaqartinneqartut tamarmik pineqarput, taakkunungalu ilaapput:

- Illunut, pilersuinermit aqqusersuutitut, isaariani aqqusinernut, biilit unittarfii-nut pisuinnaallu aqquserninit nalunaarsuineq.
- Assaanissaq qaartiterinissarlu sioqqullugu nunamik nalerisaaneq.
- Illunut sanaartukkanullu, kiisalu quinut, aneerasaartarfinnut, majuartarfinnut majorissanullu matuma siuliani taaneqartunut piiaaneq assaanerlu.
- Illunut sanaartukkanullu matuma siuliani taaneqartunut qaartiterineq.
- Aqquserniorneq, tassunga kussinilersuineq nunallu iluatigut kuuffilersuineq, biilinit unittarfilersuineq pisuinnarnullu aqquserniorneq ilanngullugit.
- Nunamik nalimmassaaneq kiisalu atortunik sinneruttunik piiaaneq.
- Illut eqqaanni nunamik immiineq iluarseeqqinnerlu.

...

4 KUUFFILERINEQ

4.1 SULIASSAP ANNERTUSSUSIA

4.1.1 Suliassani pineqarput

Kuuffiup aqutaata titartakkami takutinneqartutut puilasuliat pingaernerit tungaannut sananeqarnissaa attavilerneqarnissaalu.

...

Suliassami pingaarnersiorlugu uku suliassaapput:

- kuuffiup aqutaata \emptyset 110PE/ \emptyset 250PE 100 lbm-it missaanniitqoq
- puilasuliat saliiviit pingasut sananeqarnissaat
- puilasulianut pingaarnernut atassusiineq

4.1.2 Suliassap avataani

Kuuffiup aqutaanut qaartiterineq assaanerlu.
Innaallagissersuineq.

...”

Tasiilami inissiani qulini kuuffeqarfiup pingaarnrup suliarineqarnissaanut nassuiaammi immikkut ittumi (SA II), 15. november 2011-mi ullulerneqartumi, aammalu *Siunnersorti S*-imit suliarineqartumi imaasa allattorsimaffianni allasimavoq, immikkoortoq 1 ”aalajangersakkat nalinginnaasut”-nut, immikkoortoq 2 ”aqquersuutitut nunalerineq”-mut aammalu immikkoortoq 3 ”kuuffilerineq”-mut tunngasuusut. Tamatuma saniatigut SA II-mi ilaatigut imatut allasimasoqarpoq:

”...

II. AALLAQQAASIUT

Suliassami najukkami pilersaaruseriusumi A12-imi inissianut qulinut nutaamik (pingaarnermik) immamut kuuffilikkamik kuuffeqarfiliortoqassaaq.

...

2. AQQUERSUUTINUT NUNAGISSAANEQ

2.1 Aqqusersuutit aniinganeritut assaaneq/qaartiterineq

2.1.1 Annertussuseq

Immikkoortumi assaanerit, assaalluni piaanerit, qaartiterinerit, immikkoortiterinerit, qaqissuilluni assaanerit aammalu sumiiffiup iluani uninngatitsinerit/assartuussinerit pisariaqartut sulluunniit pineqarput, taamaalillunilu atortut naleqquttut tamarmik utertitsilluni immiinerni atoqqinneqarsinnaapput. Suliassami sullissinerit, suliassaqarfiup killingisa iluini suliassap naammassilluinnarnissaanut pisariaqartinneqartut sulluunniit ilaatinneqassapput.

Tassalu suliassami pingaarnertut suliassat pingaarnertit uku ilaatinneqassapput:

- Aqqusersuutit aniinganerinit nalunaarsuineq.
- Assaaffissami/qaartiterivissami naasunik piianeq.
- Pilersaarutit takissusissallu naapertorlugit Aqqusersuutit aqutissaanni assaaneq/qaartiterineq.
- Assaanermi/qaartiterinermi piiakkanik atoqqitassanngorlugit immikkoortiterineq, assartuussineq atugassanngortitsinerlu.
- BR.1-imik nutaamik atuinermit puilasunut pumpinik pioreersunik assaalluni piianeq eqqaanerlu, taakkunungalu innaallagissamut aqqusersuutit ikaarsaarfinilu aqqusersuutit ilaatinneqarput.

...

3. KUUFFILERINEQ

3.1 Suliassap annertussusia.

...

3.1.3 Suliassap annertussusia

Suliassami aqqusersuusersuinermit titartakkat takutinneqartut matumalu kinguliani nassuarneqartut malillugit suliaqarnermit, taamaalillunilu tamakkiisumik ingerlanissamut piareersaanermi atortunik sullissinernillu tamanik pilersuineq pineqarpoq. Taakkununga puilasuliat, puilasuliat suluunnaasartai, sinaakkutai matuulu, qisuttai nalunaarsuutit il.il. ilaapput.

Tassalu suliassami pingaarnertut suliassat pingaarnertit uku ilaatinneqassapput:

Namineerluni imaluunniit ataatsimoorluni aqqusersuutit aniinganerinit kuuffinik pilersuineq ikkussuinerlu.

Puilasulianik pilersuineq ikkussuinerlu, atortut ilanngullugit.

Kuuffit aqputaanik oqimaaluttanik betoniusunik ikkussuinnikkut qajannaarsuineq.

Naqitsinermik misileraaneq, TV atorlugu misissuineq misissugassanullu allanut uppersaasersuineq.

...”

Neqerooruteqartitsinermi najoqqutassani, nittartakkami tamanut ammasumik saqqummiunneqartuni aamma ”NEQERORUTIT ALLATTORSIMAFFII – A”, allakkiap iluani – kukkusumik ”Agguaassinermut allattuiffik A”-mik taaneqartoq, aammalu 15. november 2011-mi ullulernerqartoq ilaavoq.

Allakkiami ilaatigut imatut allassimasoqarpoq:

”...

Suliassaq A – Nunalerineq betonilerinerlu

Matumuuna ataatsigut atsiortup neqerooruteqartitsinermi najoqqutassani, SA + SB-mi, 15. november 2011-meersumi piffissami aalajangersimasumi aalajangersimasumillu akeqartinneqarlutik suliassat, matuma kinguliani agguaassinermut allattuiffik A-mi, qupp. 1-3 ilanngullugu, immikkoortiterneqartut sularinissaannut neqerooruteqarpoq.

1. 101 + 102 Nunagissaaneq kr.
2. 103 Betonilerineq aamma jernbetonilerineq..... kr.
3. 104 Suliffeqarfik, tak. TAG, AP 95
pillugu ilanngussaq 3 aamma SB..... kr.
4. Agguaassinermut allattuiffik A. naapertorlugu
saniatigut suliassinnaasut..... kr.
5. Agguaassinermut allattuiffik "T"..... kr.
6. Neqeroorutip aningaasartai katillugit..... kr.

..."

Suliassaq A-mut ilaasut – nunagissaaneq betonilerinerlu – allakkiaq "(SA I) Agguaassinermut allattuiffik A"-mik atilik aqutugalugu tamanut ammasumik saqqummiunneqarpoq. Allakkiap "Tasiilami inissiat qulit, Suliaq nr. 41036, Nunagissaaneq betonilerinerlu", 15. november 2011-mi ullulernerqartoq imaraa. Allakkiami immikkoortut ukuupput:

- AGGUAASSINERMUT ALLATTUIFFIK A (Qaartiterineq, assaaneq, nunagissaaneq betonilerinerlu), akillu "pos. 03 nunagissaaneq"-mi aalajangersarneqarput.
- "AGGUAASSINERMUT ALLATTUIFFIK A (Nunagissaanermut betonilerinernullu akit), tassanilu "pos. 7 betonilerineq"-mut, "saniatigut suliassat"-nut aamma agguaassinermut allattuiffik "T"-mut akit naatsorsorneqartussaapput.

Akit aalajangersarneri ataasiakkaat tamarmik "NEQEROORUTEQARNERMUT ALLATTUIFFIK A"-mut imm. 1, 2, 4 aamma 5-imut nuunneqartussaapput. Taamaalilluni suliassanut immikkoortunut neqeroorutit aningaasartaat saqqummissapput.

Kiisalu neqerooruteqartitsinermi najoqqutassanut nittartakkami "SA II, agguaassinermut allattuiffik, Nunagissaaneq Kuuffik Pingaarnaq, *Siunnersorti S*" tamanut ammasumik saqqummiunneqarpoq. Allakkiaq taanna allakkamik ullulernerqanngitsumik imaqarpoq:

"AGGUAASSINERMUT ALLATTUIFFIK 1-1, Suliaq nr.: 70361, Suliassat: Nunagissaaneq, aqquersuutit (SA-II imm. 1-3) Tasiilami inissianut qulinut kuuffeqarfik pingaarnaq".

Agguaassinermut allattuiffiup immikkoortut uku imarai: Ilioraaneq; piiaaneq; aqquersuutinik assaaneq; aqquersuutinut qaartiterineq; immiineq, aqquersuutinut assatanik immiineq; issamik sinnerussamik piiaalluni assartuineq; aqquernup qalliutaanik iluarsaasseqqinneq; kuuffiit isuinik iluarsineq assersui-

nerlu, kuuffiit isuisa betoninik oqimaalutalersorneqarneri; suliassat allat; aamma pitsaassutsimik qulakkeerineq. Tassani immikkoortut sisamaapput: Akiusoq, amerlassutsit, ataatsip akia aammalu akit katinneri.

Agguaassinermut allattuiffimmi 1-1-imi neqerooruteqarnermut allattuiffiit arlaat pineqarnerisq, aammalu neqerooruteqarnermut allattuiffimmi taamaattumi aningaasat sumut nuunneqassanersut ersarissumik allassimanngilaq. Kisiannili agguaassinermut allattuiffik 1-1-imi "NEQEROORUTEQARNERMUT ALLATTUIFFIK A"-mut nuussisoqartussaasoq assortorneqarsinnaanngilaq.

Neqerooruteqartitsinermut najoqqutassani nittartakkami tamanut ammasumik saqqummiunneqartumi aamma allakkiaq "NEQEROORUTEQARNERMUT ALLATTUIFFIK D", aammattaq allakkiarpiani "NEQEROORUTEQARNERMUT ALLATTUIFFIK D"-mik taaneqartoq, aammalu 15. november 2011-mi ullulernerqarsimasoq ilaavoq.

Allakkiami ilaatigut imatut allassimasoqarpoq:

"...

Matumuuna ataatsigut atsiortup neqerooruteqartitsinermi najoqqutassani, SB + SA-mi, 15. november 2011-meersumi piffissami aalajangersimasumi aalajangersimasumillu akeqartinneqarlutik suliassat, matuma kinguliani agguaassinermut allattuiffik E-mi, qupp. 1-3 ilanngullugu, immikkoortiterneqartut suliarinissaannut neqerooruteqarpoq.

1. 401 Inissianut qulinut kuuffilerineq kr.
2. 402 Kuuffimmut pingaernerinnarmut kuuffilerineq kr.

..."

Taakku saniatigut immikkoortut 3-13 pineqarput, immikkoortullu 13-ip nalaatigut neqerooruteqarnerup aningaasartaasa katinneri allanneqartussaapput.

Aamma allakkiaq "SA I Agguaassinermut allakkiaq D" nittartakkamiippoq. Allakkiaq taanna, 15. november 2011-mi ullulernerqartoq 1-imit 4-mut qupperneqarpoq, quppernernerlu taakkunani sullissinerit ataasiakkaat akissaannik immersuiffiqartussaapput. Sullissinernut ataasiakkaanut taakkununnga aningaasartaliussat katinneri "NEQEROORUTEQARNERMUT ALLATTUIFFIK D"-mi immersuiffissanut attuumassuteqartunut nuunneqartussaapput. Agguaassinermut allattuiffimmi D-mi sullissineq siulleq kuuffinnut tunngasuuvoq (illunut A-mut, B-mut aamma C-mut). Sullissinerit taakku katinneri "NEQEROORUTEQARNERMUT ALLATTUIFFIK D"-mi imm. 1-imut nuunneqartussaapput.

Immikkoortuni agguaassinermut allattuiffik D-mi "NEQEROORUTEQARNERMUT ALLATTUIFFIK D"-p aningaasartaanik nuussiffiqartussaanngitsoq kisimi tassaavoq imm. 2: "402 Kuuffimmut pingaernerinnarmut kuuffilerineq."

Kiisalu nittartakkami neqerooruteqartitsinermut najoqqutassanut allakkiaq "SA II, agguaassinermut allattuiffik, Nunagissaaneq Kuuffik Pingaarneq, *Siunnersorti S*" ilaatinneqarpoq.

Allakkiami tassani allagaq ullulerneranngilaq: "AGGUAASSINERMUT ALLATTUIFFIK 2-2, Suliaq nr.: 70361, Suliassaq: Kuuffilerineq (SA-II immikkoortoq 1-3), Tasiilami inissianut qulinut kuuffeqarfik pingaarneq".

Allattukkani immikkoortut ukupput: Ilioraaneq; nunap iluani kuuffiup aqputaa; BR 9-miit kuuffiup nuuanut assaatamut kuuffik; kuuffimmut puilasuliat; suliassat allat, tassungalu ilanngullugu kuutsitsinikkut il.il. ussissutsimik misileraaneq; pitsaassutsimik qulakkeerineq, tassunga ilanngullugu TV atorlugu videomut immiussinikkut misissuineq; pitsaassutsimik qulakkeerineq; suliassat allat; aamma pitsaassutsimik qulakkeerineq. Tassani immikkoortut sisamaapput: Akiusoq, amerlassutsit, ataatsip akia aammalu akit katinneri.

Neqerooruteqarnermut allattuiffiit arlaat imaluunniit neqerooruteqarnermut allattuiffiup immikkoortuisa arlaannut aningaasat nuunneqassanersut, agguaassinermut allattuiffik 2-2-mi-mi allassimanngilaq. Tassanngaanniit aningaasat "NEQEROORUTEQARNERMUT ALLATTUIFFIK A"-mut imaluunniit "NEQEROORUTEQARNERMUT ALLATTUIFFIK D"-mut nuunneqassanersut nalorneqarpoq.

25. januar 2012-imi iluarsissutitut allakkiaq nr. 1 nassiussuunneqarpoq, aammalu neqerooruteqartitsisarnermut nittartakkamut ikkunneqarluni.

Iluarsiissutitut allakkiaq aallaqqaammut iluarsisassat, ilanngussassat nutaat imaluunniit najoqqutassani aallaqqaammut saqqummersuni siornatigut iluarsisaasimasut suliarineqarsimasulluunniit taartissaasa suunerinik imaqarpoq. Ilanngussat iluarsissutitut allakkiamut ilaliunneqarput.

Iluarsiissutitut allakkiami qupp. 7-imi iluarsissutitut allakkiamut "ilanngussat allattorsimaffiat" takuneqarsinnaavoq. Ilanngussat ilaat NEQEROORUTEQARNERMUT ALLATTUIFFIK A – iluarsisaq-mut tunngasuuvoq. Ilanngussaq alla "*Siunnersorti S*"-imut tunngasuuvoq, aammalu iluarsissutitut allakkiaq, "*Siunnersorti S* Kalaallit Nunaat nr. 1"-imik taaneqartoq ilaavoq. Nittartakkami paasissutissat malillugit allakkiaq taanna "*Siunnersorti S* iluarsissutitut allakkiaq tamarmiusoq"-mik taaneqarpoq. Allakkiaq qulequtaraa "Tasiilami inissianut qulinut kuuffik pingaarneq, 17. jan. 2011, SULIAQ NR.: 70361, ILUARSISSUTITUT ALLAKKIAQ 1".

"*Siunnersorti S* iluarsissutitut allakkiaq 1" taamaallaat ataatsimik qupperneqarpoq. Quppernermi tassani ilaatigut allassimavoq:

"...

1. Agguaassinermut allattuiffiit pillugit

a. Agguaassinermut allattuiffimmik nutaamik nassiussisoqassaaq

..."

Qupperneq 1-ip kingorna ilanngussaq siulleq "NEQEROORUTEQARNERMUT ALLATTUIFFIK suliassaq A" suliassami pingaarnermi nunagissaanermut kuuffilerinermullu tunngasuvoq. Tassani ilaatigut imatut allassimasoqarpoq:

"...

Tasiilami inissianut qulinut kuuffik pingaarneq

Suliassanut immikkoortunut matuma siuliani taaneqartut tunngavigalugit "Piumasaqaatit immikkut ittut" (SB), 15. november 2011-meersut, neqerooruteqartitsinermut allakkiaq (US) naaperotrlugu allannguuteqarsimasinnaasut, kingusinnerusullu US-imut ilassummik nassiusaqarfigineqartut suliarineqarput – aammalu ilanngussami ilaliunneqartumi immikkoortut naapertorlugit matuma kinguliani atsiortoq neqerooruteqarpoq, akit uku aammalu tunngavissat immikkut ittut matuma kinguliani allassimasut tunngavigalugit suliassanik pineqartunik suliaqarnissamut neqerooruteqarpoq:

1. Neqeroorutip aningaasartai

Agguaassinermut allattuiffik nr. 1-1, Nunagissaaneq kr.
Agguaassinermut allattuiffik nr. 2-2, Kuuffilerineq
Agguaassinermut allattuiffik nr. T-1 kr.
NEQEROORUTIP ANINGAASARTAI kaatillugit kr.	_____

..."

Neqerooruteqartut arlaannaataluunniit neqerooruteqarnermut allattuiffik taanna immersunngilaa, taassuma iluarsissutitut allakkiamut ilanngunneqarnera kukkunerusimassasoq isumaliortoqartoqartariaqarmat.

Siunnersorti S-imut iluarsissutitut allakkiamut 1-imut tamarmiusumut ilaliussani tullerni marlunni agguaassinermut allattuiffiit 1-1 aamma 2-2 ilanngunneqarput. Takku agguaassinermut allattuiffiit nassiunneqartut siulliit assigaat, taamaallaat agguaassinermut allattuiffinni nutaani immikkoortut uku ilaajunnaartinneqarsimallutik: Immikkoortunut ataasiakkaanut akit aamma akit katinneri.

Iluarsiissutitut allakkiamut nr. 1-imut ilaliussat sinnerini (*Siunnersorti S*-ip iluarsissutitut allakkiaanut 1-imut paarlaanneqassanngilaa) aamma ilanngussaq taaguutilik "3 a- neqerooruteqarnermi agguaassinermut allattuiffik"-mik atilik naqinneqarpoq.

Ilanngussap taassuma aamma ilanngussat "NEQEROORUTEQARNERMUT ALLATTUIFFIK suliassaq A" aamma agguaassinermut allattuiffiit 1-1 aamma 2-2 imarai. Taakku *Siunnersorti S*-ip iluarsissutitut allakkiaanut ataatsimoortunut ilanngussat assigaat. Tamatuma saniatigut ilanngussaq alla "AGGUAASSINERMUT ALLATTUIFFIK "T-1", suliaq nr.: 70361, suliassaq: Tapiliussatut suliassaasinnaasut, Tasiilami inissianut qulinut kuuffik pingaarneq" ilaliunneqarpoq.

Kiisalu iluarsissutitut allakkiaq nr. 1 "NEQEROORUTEQARNERMUT ALLATTUIFFIK A"-mut iluarsisamut ilaliussatut ilanngunneqarpoq. Neqerooruteqarnermut

allattuiffimmi iluarsisami, 25. januar 2012-imi ullulerneqartumi ilaatigut imatut allassimasoqarpoq:

”...

Tasiilami inissiat qulit
Suliaq nr. 41036
Nunagissaaneq betonilerinerlu

Suliassaq A – Nunagissaaneq betonilerinerlu

Matumuuna ataatsigut atsiortup neqerooruteqartitsinermi najoqqutassani, SA + SB-mi, 15. november 2011-meersumi piffissami aalajangersimasumi aalajangersimasumillu akeqartinneqarlutik suliassat, matuma kinguliani agguaassinermut allattuiffik A-mi, qupp. 1-3 ilanngullugu, immikkoortiterneqartut sularinissaannut neqerooruteqarpoq.

1. 101 Nunagissaaneritkr.
2. 102 Nunagissaanerit, kuuffeqarfik pingaarneq.....kr.
3. 103 Betonilerineq aamma jernbetonilerineq.....kr.
4. 104 Suliffeqarfik, tak. TAG, AP 95 pillugu
ilanngussaq 4 aamma SBkr.
5. Agguaassinermut allattuiffik A. naapertorlugu saniatigut
suliassasinnaasutkr.
6. Agguaassinermut allattuiffik ”T”kr.
7. **Neqeroorutip aningaasartai katillugit**.....kr.

...”

Immikkoortut 1 aamma 2 sionatigut immikkoortup 1-ip ataani ataatsimoorsimagaluartut, neqerooruteqarnermut allattuiffimmi avinneqarput. Taamatulli allanngineq agguaassinermut allattuivik A-p, siusinnerusukkut tamanut saqqummiunneqartup iluarsaanneqarneranik kinguneqanngilaq. Taamaattumik agguaassinermut allattuiffik A suli siusinnerusukkut immikkoortuusimasumi ”NEQEROORUTEQARNERMUT ALLATTUIFFIK A”-mi siullermi aningaasanik nuussivissanut innersuussutinik imaqarpoq, tassanilu neqerooruteqarnermut allattuiffimmi iluarsisami immikkoortunut innersuussisoqanngilaq.

Tamatuma kingorna kukkuneq taanna aqqinneqaaqaarani, imaluunniit neqeroorutinit agguaassinermullu allattuiffiit paasineqarnerat pillugu neqerooruteqarsinnaasunit neqerooruteqartitsisumut apeqqutinik attuumassuteqartunik paasisaqarfiusussanik nassiussisoqaaqaarani, iluarsiiisutitut allakkiat 2 aamma 3 nassiussuunneqarput.

Siunnersorti S-ip iluarsiiisutitut allakkiaani 1-imut aamma neqerooruteqartitsinermi misissuinissamut pilersaarut SB-mut ilanngussaq 3, 15. november 2011-meersoq, *Siunnersorti* S-imit sularineqartoq ilaavoq. Quppernemi marluusuni quppernermi 1-imi allassimavoq, tassani pineqartut tassaasut Tasiilami inissianut qulinut kuuffik pingaarneq aamma ”Suliassaq/ sulinissaq/ illumut tunngasut: SA01, 02 kuuffiit aniinganeranut qaartiterineq nunagissaanerlu”.

Qupperneq 2-mi allassimavoq, taanna Tasiilami inissianut qulinut kuuffimmut pingaarnermut aammalu "Suliassaq/ sulinissaq/ illumut tunngasut: SA01, 03 Kuuffilerineq"-mut tunngasuusoq.

Iluarsiissutitut allakkiaq 1-imut aamma neqerooruteqartitsinermi misissuinissamut pilersaarut 15. november 2011-meersoq, 23. Januar 2012-imi iluarsaanneqartoq "vvs ing."-imut innersuussutitaqartoq ilaavoq. Tassani allassimavoq, taanna "Suliassaq/ sulinissaq/ illumut tunngasut: SA04 kuuffimmut ikkuffik"-mut tunngasuusoq.

Neqeroorutininik tunniussinissamut 28. februar 2012, nal. 10 killiliunneqarpoq, aammalu ullormi nalunaaquttamilu tassani sulariumannittussarsiuussiffiusumik ataatsimeeqatigiissitsisoqarpoq. *MMP*, maalaarutigineqartumi Sanaartornermut Avatangiisinullu ingerlatsivimmi suliamut isortaasoq sulariumannittussarsiuussinermik ingerlatsisussaasimagaluarpoq, kisiannili piffissaq eqqorlugu aggersinnaasimanani. Tamanna pissutigalugu suleqataa *JCP* neqeroorutininik ammarterisuuvoq atuaasuullunilu.

Neqeroorut katillugit tallimat tunniunneqarput, taakkunanngalu marluk, *Entrepreneur Z*-imeersoq ilanngullugu, suliassanut tallimanut tamarmiusunut tunngasuupput. Maalaaruteqartup neqeroorutaa taamaallaat suliassaq A-mut tunngasuuvoq, neqerooruteqartullu marluk allat neqeroorutaat D-mut aamma E-mut tunngasuullutik.

Maalaaruteqartup neqeroorutaani allassimavoq, tassani "NEQEROORUTE-QARNERMUT ALLATTUIFFIK A" iluarsisat atorreqarsimasoq. Aammattaaq ilaatigut allassimavoq:

"...

Tasiilami inissiat qulit
Suliaq nr. 41036
Nunagissaaneq betonilerinerlu

Suliassaq A – Nunagissaaneq betonilerinerlu

Matumuuna ataatsigut atsiortup neqerooruteqartitsinermi najoqqutassani, SA + SB-mi, 15. november 2011-meersumi piffissami aalajangersimasumi aalajangersimasumillu akeqartinneqarlutik suliassat, matuma kinguliani agguaassinermut allattuiffik A-mi, qupp. 1-3 ilanngullugu, immikkoortiterneqartut sularinissaannut neqerooruteqarpoq.

1. 101 Nunagissaanerit	kr.	1.379.900
2. 102 Nunagissaanerit, kuuffeqarfik pingaarneq.....	kr.	3.207.000
3. 103 Betonilerineq aamma jernbetonilerineq.....	kr.	2.459.800
4. 104 Suliffeqarfik, tak. TAG, AP 95 pillugu ilanngussaq 4 aamma SB	kr.	437.700
5. Agguaassinermut allattuiffik A naapertorlugu saniatigut suliassasinnaasut.....	kr.	82.100
6. Agguaassinermut allattuiffik "T"	kr.	207.500
7. Neqeroorutip aningaasartai katillugit	kr.	7.774.000

...

Maalaaruteqartup iluarsissutitut allakkiaat tamaasa tigusimallugit neqeroorutip naanerani uppersarpaa.

Maalaaruteqartup agguassinermit allattuiffik 1-1-ip aamma 2-2-p ataatsimoortitsineratigut, aammalu aningaasanik "NEQEROORUTEQARNERMUT ALLATTUIFFIK A"-mi immikkoortoq 2-mut nuussineratigut aningaasat 3.207.000 koruunit saqqummerput.

Entreprenør Z-ip neqeroorutaani allassimavoq, taamaallaat agguassinermit allattuiffik 1-1 atorpeqarsimasoq, tassanngaanniillu aningaasat neqerooruteqarnermit allattuiffimmi immikkoortumut 2-mut nuunneqarsimasut.

Entreprenør Z-ip neqeroorutaa suliariumannittussarsiuussinerup 28. Februar 2012-imi pinngitsiarnerani *RH*-mit, Nuummi *Ingerlatseqatigiiffik Q*-mi atorfeqartumit saqqummiunneqarpoq.

Tassanngaanniit *Entreprenør Z*-imi atorfeqartumut mail-ikkut attaveqaqateqarnerup naqinnerata ilaani ilaatigut imatut allassimasoqarpoq:

"...

Hej J,

Matumuuna 28. februar 2012-imi suliariumannittussarsiuussinermit peqa-taasimallunga uppersarpara.

...

Nal. 10 sioqqullugu neqeroorutit ataatsimoortut allakkat puuannut matoqqasumut ikillugit tunniuppakka.

..."

Tamatuma kingorna Eqqartuussissuserisup *FM*-ip *RH*-mut allakkatigut uppersartinniaraluarppaa, allakkanik matoqqasunik, *Entreprenør Z*-ip neqeroorutaanik imalimmik suleqatiminit tigusimalluni; najoqqutassanik *Entreprenør Z*-imit tigusaqarsimanani; allakkat ammarsimanagit, taamaattumillu allakkat puusa imai atuarsimanagit; aammalu allakkat suliariumannittussarsiuussilluni ataatsimeeqatigiinnermi ammarneqarsimasut. *RH* tamanna pillugu eqqartuussissuserisumut uppersaasimangilaq, kisiannili sms-ikkut *Entreprenør Z*-imut mail-erutigisimasani, 7. august 2012-imeersoq innersuussutigisimallugu.

Entreprenør Z-ip suliassaq *A*-p ataani nunagissaanermut neqeroorutaa kisimi suliariumannittussarsiuussinermit atuarneqarsimammat isumaqatigiissutigineqarpoq, naak suliariumannittussarsiuussinermit imaqarniliami 1. marts 2012-imeersumi *Entreprenør Z*-ip neqeroorutaa suliariumannittussarsiuussinermit

tamanut ammasumik saqqummiunneqarsimasoq allassimagaluartoq. Kisiannili piffissaliussap iluani *Entrepreneur Z* suliassanut tamanut neqeroorummik tunniussisimanersoq, taamaallaalli tamakkerluni suliariumannittussarsiuussinermi atuarneqarsimannginnersoq isumaqatigiinngissutigineqarpoq. Suliariumannittussarsiuussineq tukattumik ingerlasimasoq, aammalu suliariumannittussarsiuussinerup nalaani matut matuneqareernerini allakkanik tunniussisoqarsimasoq, allakkalli taakku *Entrepreneur Z*-ip neqeroorutaanut tunngasuunngitsut isumaqatigiissutigineqarpoq.

Suliariumannittussarsiuussinerup kingorna *Siunnersorti R*-imi *JW* neqeroorutini misissuissamut, aammalu kommunimut innersuussummik suliaqarnissamut suliakkerneqarpoq. Suliami innersuussutit pingasut saqqummiunneqarput. Innersuussut ulluligaanngitsaq, innersuussut 10. april 2012-imi ullulerneqartoq aammalu innersuussut 23. april 2012-imi ullulerneqartoq. Innersuussut iluarsisaq aningaasaqarnermut naatsorsukkanik innersuussummumut 10. april 2012-imeersumut naleqqiullugit iluarsisanik imaqarpoq. Innersuussutit 10. aamma 23. april 2012-imi ullulerneqartut innersuussummumut ulluligaanngitsumut assigiinngissutigisaat imatut imaqarpoq:

”...

Eqqartuussissuserisoqarfik MHD-p allakkanut 27.03.2012-imeersunut neqerooruteqarnermut nassuiaat ilannguppaa, tassani inerniliissutigineqarpoq, neqerooruteqartitsinerumut najoqqutassat iluarsiuussutitullu allakkat ersernerluttortaqaraluartut, suliassat tamarmik *Entrepreneur Z*-imut, akikinnerpaamik neqerooruteqartumut tunniunneqarnerat inatsisinik unioqqutitsinerunngitsaq.

...”

Innersuussutit arlaannaalluunniit maalaaruteqartup neqeroorutaata piumasaqaatinut naleqqutinnginnera pillugu paasissutissanik imaqanngilaq. Kisiannili 11. april 2012-imi inuk ataaseq, *R*-imik ateqartoq, *Siunnersorti R*-imeersoq, *MMP*-mut mail-ikkut allagaqarpoq, tassani allassimavoq, innersuussummik nutaamik neqeroortunullu allakkanik nutaanik ilanngussisoqartoq. Mail taanna ullormi tassani *Eqqartuussissuserisoqarfik MHD*-mut kiisalu *JK*-mut, maalaarutigineqartumilu teknikkeqarnermut ingerlatsinermullu pisortamut ingerlateqqinneqarpoq. Tassani allassimavoq, innersuussut 10. april 2012-imeersoq pdf-fil-inngorlugu aamma neqerooruteqartunut ataasiakkaanut allakkat, tassungalu ilanngullugu maalaaruteqartumut allakkat nalinginnaasumik docx-inngorlugit ilaliunneqartut. Allakkami tassani ilaatigut imatut allassimasoqarpoq:

”...

Suliamut matuma siuliani taaneqartumut neqeroorutit qujassutigalugit nalunaarutigissavarput, neqeroorutit piumasaqaatinut naleqqutinngitsutut ilaatinneqarsinnaanngimmat, naak pissutsit annertunerusumik annikinnerusumilluunniit utoqqatsinarsinnaagaluartut.

Kisiannili erseqqissaatigineqassaaq, piumasaaqatinut naleqqutinngitsoqarnera isumaqartinneqarsimanngimmat, tassami *neqeroorutit* entreprenøritut akikinnerpaajunngitsoq naliliisoqarmat.

...”

Maalaaruteqartoq allakkanik, allakkap allannerani oqaasertaritinneqartut assiginik oqaasertalinnik tigusaqarsimanngilaq. Allakkat 13. april 2012-imeersut aqqutigalugit maalaaruteqartoq ilaatitut imatut ilisimatinneqarpoq:

”...

Suliariumannittussarsiuussinermut matuma siuliani taaneqartumut neqeroorutit qujassutigalugu matumuuna nalunaarutigissavarput neqeroorutit ilaatinneqanngimmat. Tassani entreprenørimit allamit suliassanut tamanut ataatsimut akikinnerusunik neqerooruteqartoqarmat.

...

Tamakkiisumik paasititsinissaq eqqarsaatigalugu aamma erseqqissaatigineqassaaq, ilinnit neqeroorut piumasaaqatigineqartunut naapertuutinngimmat, neqerooruteqarnermut allattuiffimmi imm. 2-p, ”Nunagissaaneq, kuuffik pingaarneq” ataani agguassinermut allattuiffik 1.1 taamatullu agguassinermut allattuiffik 2.2 ilanngussimagakkit.

Tassani piumasaaqatinut naleqqutinngitsoqarnera isumaqartinneqarsimanngilaq, tassami oqaatigineqareersutut neqeroorut alla akikinnerusimammammat.

...”

Suliariumannittussarsiuussinermi imaqarniliaq malillugu *Entreprenør Z*-ip neqeroorutaa katillugit 28.178.317 koruuninik naleqarpoq, kisiannili *Entreprenør Z*-ip suliassaq tamakkerlugu tigussappagu 2.000.000 koruuninik akikilliliisoqartussavoq.

Aammattaaq *Entreprenør Z*-ip neqeroorutaani allassimavoq, akileraartarnermut aqutsisoqarfiup 24. februar 2012-imi ilisimatitsissutigisimagaa, *Entreprenør Z* akileraarutinut A-nut, AMA-mut aammalu akissarsianit ilanngaatinut akilerneqanngitsunut akilinngitsuukkanik akiitsoqartoq. Akiitsut akilinngitsuukkat 2012-imi januaarip naanerani erniat ilanngunnagit 1.817.098,26 koruuniupput. 24. februar 2012-imi akileraartarnermut aqutsisoqarfimmut akilersuinissamut isumaqatigiissuteqartoqarpoq, tassani 500.000 koruunit erninnaartumik akilerneqarlutik, tamatumalu kingorna akilersugassat pingasunngorlugit avinneqarlutik. Akilersukkat kingullit erniaat ilanngullugit 15. maj 2012-imi akilerneqartussapput. Akilersukkat siullit piffissaq eqqorlugu akilerneqarput, aammalu tamatuma kingorna *Entreprenør Z* pisussaaffimminik sumiginnaasimanersoq pillugu paasissutissiisoqanngilaq. Akilersuinissamut isumaqatigiissut sumiginnarneqarsimappat, isumaqatigiissut tamarmiulluni atorunnaartussavoq.

Maalaaruteqartup neqeroorutaani allassimavoq, akileraartarnermut aqutsisoqarfimmit nalunaarummik ilanngussisoqartoq, tassanilu akileraartarnermut aqutsisoqarfiup uppersarsaraa, ingerlatseqatigiiffimmut akiliinissamik piumasaqaateqartoqanngitsoq.

Entrepreneur Z 14. juni 2008-mi pilersinneqarpoq. Malittarisassat tamatumalu kingorna 2010-imi maajimi allannguutit *Eqqartuussissuserisoqarfik MHD*-p allaffissiaataanut allagaapput, taamatullu eqqartuussissuserisut *PK* aamma *WM* suliffeqarfimmit tassanngaanneersut 2011-mi pisortat allannguuteqarnerat pillugu Inuussutissarsiornermut Ingerlatseqatigiiffinnullu Aqutsisoqarfimmut nalunaaruteqarput.

Maalaaruteqartarfiup 6. juni 2012-imi aalajangiinerata kingorna maalaarutigineqartoq *Entrepreneur Z*-imut isumaqatigiissuteqarpoq.

Suliap oqaasiinnaat atorlugit sularineqarnerani *NM*, *JW*, *MMP*, *JCP* aamma *TB* nassuiaateqarput.

NM ilaatigut nassuiaavoq, maalaaruteqartumi pisortaanertut atorfeqarluni. Suliassaq nassuiaatillu tassunga atasut nammineerluni misissorsimavai, taakkulu tunngavigalugit neqeroorut sularisimallugu. Aatsaat 16. februar 2012-imi neqerooruteqartitsinermit najoqqutassanik pissarsisinnaasimavoq. Taakku mappimut iluarsisutitut allakkiamik ilaqartinneqarlutik ataatsimoorsimapput. Iluarsisutitut allakkiamut 1-imut tunngatillugu isumaqarpoq, kuuffilerinerup, suliassamut A-mut aamma suliassamut D-mut ilaatinneqartup akissaat aalajangersarneqartussaasut. Iluarsisutitut allakkiap 1-ip nassiunneqarnissaa sioqqullugu neqeroorutit kissaatigineqartut taamaallaat inissianut qulinut suliassamut tunngasuupput; kisiannili iluarsisutitut allakkiap nassiunneqarnerani aamma kuuffimmut pingaarnermut neqerooruteqartoqartussanngorpoq. Neqerooruteqarnermini "NEQEROORUTEQARNERMUT ALLATTUIFFIK suliassaq A", suliassanut tamarmiusunut, nunagissaanermut kuuffilerinerimullu atuuttussaq, agguaassinermut allattuiffimmut 1-1-imut aamma 2-2-mut saqqartaliunneqartoq atorsimangilaa. Saqqartaliussami tassani agguaassinermut allattuiffik 1-1-imut aamma 2-2-mut innersuussuteqartoqarpoq. Malugisimavaa, "NEQEROORUTEQARNERMUT ALLATTUIFFIK suliassaq A"-mi agguaassinermut allattuiffik 1-1-ip nalaani taamaallaat aningaasartaliussassat allaffissaqartut, tamannali annertunerusumik isumaqartutut paasisimangilaa. Paasisai malillugit iluarsisutitut allakkiap 1-imi "Suliassaq A – Nunagissaaneq betonilerinerlu" pillugu saqqartaliussaq/ neqeroorutit allattorsimaffiat ilanngunneqartoq atortussaasimavaa. Suliassaq A-p ataani agguaassinermut allattuiffik 1-1 aamma 2-2 immersorneqartussaasut. Aamma neqerooruteqartitsinermit misissuinissamut pilersaarut, SB-mut ilaliussaq 3 naapertorlugu tamanna pivoq, taamatullu agguaassinermut allattuiffiit 1-1 aamma 2-2 suliassaq A-mut ilaatinneqarlutik neqerooruteqartitsinermit najoqqutassaniipput. Taamaattumik isumaqarluinnarpoq, *maalaaruteqartoq* piumasaqaatinut naapertuuttumik neqerooruteqarsimasoq. Suliariumannittussarsiuussinerpiamut tunngatillugu suliap ingerlanera pillugu suleqatiminit, *TB*-mit, inimi neqeroorutit ammarneqarfianni atuarneqarfiannilu najussimasumit oqaluttuunneqarsimavoq. *TB* oqarsimavoq, inimi najuuttut tassaasimasut *JCP*, *RB*, *RH*, aammalu *TB* nammineq. Neqeroorutit nal. 10 ammarne-

qarsimapput, *JCP* allakkat puunik ammarterisuulluni, aammalu neqeroorutiniq galeriissuisuulluni. Tamatuma kingorna neqeroorutit atuarneqarsimapput. Neqerooruteqartuupput *Entreprenør X*, *maalaaruteqartoq*, *Entreprenør Y*, aamma *Entreprenør Z*. Neqeroorutiniq atuaanerup kingunitsianngua *TB* apeqquteqarsimavoq sanasut suliassaannut allanik neqeroortoqarsimannnginnersoq, tassungalu taamaattoqannginnera akissutigineqarsimavoq. Allakkat puui tamarmik ammarneqarput. Tamatuma kingorna suliariumannittussarsiuussineq naammassisimavoq, najuuttullu inimiit anisimapput. Nammineerluni suliariumannittussarsiuussinernut amerlasuunut peqataasarsimavoq, kisiannili suliariumannittussarsiuussineq manna tukattorujussuarmik ingerlasimavoq. Oqaluttuunneqarnera malillugu inuit inimit suliariumannittussarsiuussiviusumut iseqattaarlutillu anisaqattaarsimapput, aammalu inimit matu aatsaat nal. 10.15 paarnaarneqarsimavoq. 1. imaluunniit 2. marts 2012-ip missaani suliariumannittussarsiuussinermut imaqarniliaq tigusimavaa. Imaqarniliami allassimavoq, *Entreprenør Z* suliassanut tamanut neqerooruteqarsimasoq, tassunga akikilliliissutit ilaasimallutik. Nammineq tupaatigisimavaa, suliariumannittussarsiuussinernup ingerlanera imaqarniliami taaneqartutut ingerlasimannngimmat. Napparsimanini pissutigalugu aallaqqaammut suliariumannittussarsiuussinermut imaqarniliamut akerliliissummik nassiussaqaarsimannngilaq. Maalaarutigineqartup *Eqqartuussissuserisoqarfik MHD* siunnersortitut atorsimagaa ilisimasimasuuguniuk, suliassanut neqerooruteqarsimassannngikkaluarpog. Taarsiissuteqartoqarnissaanik piumasaaqaatissanik naatsorsuinermit suliffeqarfiup suliassami sinneqartoortutut naatsorsuinermit naatsorsueriaaseq atorsimavaa. Kiisalu atortunik attartorsimavoq atortunillu erniortinneqartussanik atuisimalluni. Suliassami taakku matussuserniarneqarsimapput. Aamma suliariup pineqartumi suliffeqarfiup Tunumi pilersitsinissaa ilanngullugu naatsorsorsimavaa, taamaattumillu sinneqartoortutut naatsorsuutigineqartut isertitat ilassutissaattut isiginiarsimanagit. Kiisalu suliffeqarfik nammineerluni aningaasartuuteqarsimavoq, taakkununga ininut aningaasartuutit, piffissamik atuinermi nalunaaquttap akunneranut 510 koruuniusut il.il. ilaatinneqarlutik. Neqerooruisornermi naatsorsuinermit nalunaaquttap akunneri 65-it atorsimavai.

JW ilaatigut nassuiaavoq illussanik titartaasartuulluni, aammalu *Siunnersorti R*-imik piginnittuulluni. Ukiuni 40-ni Kalaallit Nunaani pilersaarusiortarnernik suliarsimavoq. Tasiilami inissiat qulit pineqartut titartarsimavai, pilersaarusiortarnernu isumagisimallugu. *Siunnersorti R*-ip 'inissiat qulit' pilersaarusiortarsimavai aammalu 'kuuffimmut pingaarnermut' neqerooruteqartitsinermit najoqqutassat suliarsimallugit. Kuuffimmut pingaarnermut nunagissaaneq aammalu inissianut qulinut kiisalu kuuffimmut pingaarnermut kuuffilerineq suliassanut immikkut ittunut marlunnut avitaapput, tassalu suliassaq A-mut aamma suliassaq D-mut. Suliariumannittussarsiuussinernup inernerisaanik *entreprenørit* assigiinngitsut marluk suliarinnittunngorsinnaammata tamanna naapertuuttussaammata taamatut iliortoqarpoq. "NEQEROORUTEQARNERMUT ALLATTUIFFIK suliassaq A"-p suliassanut pingaarnermut, nunagissaanermut kuuffilerinermullu atuuttussannngortinneqarnissaanik iluarsiiissutitut allakkiaq 1-imut ilanngussineq kukkuneruvoq. Kuuffimmi pingaarnermi suliassat siusinnerusukkut immikkoortillugit neqerooruteqarfigitinneqarsimanerat tamatumunnga pissutaasinnaavoq. Nammineerluni iluarsiiissutitut allakkiaq misissorsimannngilai. Kisiannili neqerooruteqartitsinermit najoqqutassiat ersernerlussimannngillat, nunagissaanerup ataani kuuffi-

lerinissaq taaneqarsimangimmat. Neqeroorutinut aningaasartaliussassat allaffissaat paatsoorneqarsinnaangilaq. Iluarsissutitut allakkiaq assigiinngitsunik peqquteqartumik nassiuussuunneqarput, assersuutigalugu neqerooruteqarsinnaasut saaffiginnissuteqarnerat apeqquteqarneralluunniit tunngavigineqarluni. Iluarsissutitut allakkiaq 1 ilaatigut nassiunneqarpoq, "Suliassamut A-mut neqerooruteqarnermut allattuiffik A" nassiunneqartoq siulleq kukkusumik normulerneqarsimammatt. Suliariumannittussarsiuussinerup kingorna neqeroorutit misissortussaavai, aammalu maalaarutigineqartumut inassuteqaammik suliaqartussaalluni. Kisiannili maalaarutigineqartoq aamma neqeroorutit nalilersuiffigineqarnerinut peqataasimavoq. Maalaaruteqartup neqeroorutaa piunasaqaatinut naapertuutinngitsutut isumaqarfigisimavaa, "NEQEROORUTEQARNERMUT ALLATTUIFFIK A" kukkusumik immersorneqarsimammatt. Maalaaruteqartup neqeroorummini kuuffimmatt pingaarnermut kuuffilerineq nuna-gissaanerup ataanut inississimavaa, taamaattumillu neqeroorut piunasaqaatinut naapertuutinngitsutut isigineqartariaqarluni. "NEQEROORUTEQARNERMUT ALLATTUIFFIK A"-mi pos. 102-p neqeroorummiit tamakkiisumik ilaannaasumilluunniit peerneqarnissaa eqqarsaatigineqarsimangilaq. Tamatuma kingorna maalaaruteqartup neqeroorutaa iluarsineqarsinnaasimangilaq, taamaalillunilu maalaaruteqartup "NEQEROORUTEQARNERMUT ALLATTUIFFIK A"-mik kukkusumik immersuisimanera saneqqutiinnarneqarsinnaasimanani. *Entrepreneur Z*-ip neqeroorutaa piunasaqaatinut naapertuuppoq. Neqerooruteqarnermut allattuiffiit aamma agguuaassinermut allattuiffiit eqqortumik immersorneqarsimapput. Pisortanut akiligassanngortinneqartunik akiitsoqannginnerannut akileraartarnermut aqutsisoqarfimmit nalunaarummik ilanngussisimanginnerat neqeroorutip piunasaqaatinut naapertuutinnginneranik isumaqanngilaq. Neqerooruteqartoq uppersarsaammik, pisortanut akiitsunut akilersuinissamut isumaqatigiissuteqartoqarsimanera pillugu allassimasumik saqqummiussippat, tamanna naammattussaavoq. Periaaseq tamanna nalinginnaasuvoq, tamannalu aamma Tasiilami pineqaatissinneqarsimasunut inissiisarfiup nutaap suliariumannittussarsiuunneqarnerani atorneqarsimavoq. Ilisimasai malillugit neqerooruteqartitsinermi allami neqerooruteqartitsinermi najoqqutassat assinganik ilulerneqarsimapput, kisiannili tassani aqqqissuussineq taamaattoq akuerineqarsimavoq. Neqeroorutit tunniunneqartut tunngavigalugit suliassap *Entrepreneur Z*-imut suliassatut ilivitsuusutut tunniunneqarnissaa inassutigisimavaa. Suliffeqarfik alla ataasiinnaq – *Entrepreneur Z*-itut – suliassami ilivitsuusumi suliassanut tamarmiisunut neqerooruteqarsimavoq, taannali akisunerusimavoq. Suliassanut ataasiakkaanut neqeroorutit kattunneqarnissaat akikinnerulersitsisinnaasimangilaq. *Entrepreneur Z*-ip suliassamut 2 mio. koruuninik akikillissuteqarnera tamatumunnga pissutaavoq. Isumaa malillugu suliariumannittussarsiuussinerup kingunitsiannua neqeroorutit nalilersorsimavai. Suliariumannittussarsiuussinerup kingorna neqeroorutit pillugit maalaarutigineqartoq allaqattaatigisimavaa. Kisiannili sooq maalaaruteqartup neqeroorutaa piunasaqaatinut naapertuutinngitsutut inassuteqaammimi taasimanerlugu nassuiarsinnaangilaa, kisiannili *Entrepreneur W*-ip neqeroorutaa ersarissumik piunasaqaatinut naleqqutinngitsutut taaneqarpoq. Tassunga nassuiaat maalaarutigineqartumut suliaq, tamatumalu saniatigut aamma maalaarutigineqartup nammineerluni neqeroorutinik nalilersuinermut peqataasimanera pillugu attaveqateqarnermi allami nassaarineqarsinnaassaaq. Kisiannili uppersarsinnaavaa, 10. april 2012-imi allaffimminiit neqerooruteqartunut allakkanut missiliummik nassiuussisoqarsi-

masoq, taakkunungalu aamma allagaq, maalaarutigineqartup neqeroorutaata piumasaqaatinut naapertuutinnngitsutut taaneqarfigisaa ilaavoq. Isumaqaannginnerarpoq, neqeroorutit allat piumasaqaatinut naapertuuttutut inassuteqarnerani aalajangiisuusinnaasut, *Entrepreneur Z*-ip neqeroorutaa akikinnerusimammat. Inassuteqaatini marluusuni allakkiaq, *Eqqartuussissuserisoqarfimmit MHD*-mit suliarineqartoq innersuunneqarsimammat, neqeroorutit arlaasa piumasaqaatinut naapertuuttuunerat pillugu eqqartuussissuserisumik *NHD*-mik oqaloqateqarsimanerani isumaqaanngilaq. Maalaarutigineqartup nammineerluni taamatut allakkiornissaq aallarnigarisimasinnaavaa. Aamma inassuteqaasionermini allanik oqaloqateqarsimannginnerarpoq.

MMP ilaatigut nassuiaavoq, maalaarutigineqartumi Sanaartornermut Avatangii-sinullu Ingerlatsivimmi pilersaarusiornermut pisortaalluni. Suliffeqarfimmi namminersortumi taamatullu kommunimi ingerlatsivimmi atorfeqarnermini neqerooruteqartitsarnerit ingerlanneqartarnerinik misilittagaqarpoq. Maalaarutigineqartup sanaartugassanik ingerlatsinermi sanatitsisunut siunnersortimik atorfinitsitsarnera aalajangersimasumik suleriaasiuvoq. Suliariumannittussarsiuussinermut atatillugu tassanga ingerlatsisuunissaa eqqarsaatigineqarsimavoq. Kingusi-naartussaallunili ilisimasimavaa, taamaattumillu suleqataa *JCP* suliariumannittussarsiuussinermit aqutsissasoq isumaqatigiissutigineqarpoq. Nammineerluni nal. 10.10 missaani takkussimavoq. Tassani nerrivimmi ammalortumi *JCP* neqeroorutinik atuaalluni aallartissimavoq, neqeroorutillu ammarterneqarsimasut saniani qaleriissillugit ilineqarsimapput. Tamatuma kingorna, nal. 10.12 missaani, sulisut ilaat mail-imik, *Entrepreneur W*-ip neqeroorutaanik imalimmik eqqussivoq. Kisiannili paasinarsivoq *Entrepreneur W*-ip neqeroorutaasa assinganik neqeroorutit ammarneqareersut qaleriit akornanniittoqartoq. Kisiannili *Entrepreneur W*-ip neqeroorutip saqqaa/ neqerooruteqarnermut allattuiffik immersorsimanngilaa, taamaattumillu taanna neqeroorutaani amigaataavoq. Suliariumannittussarsiuussinerup aallartereernerani *Entrepreneur W*-imiit mailerutaasup saniatigut neqeroorutinik allanik inimut eqqussisoqaanngilaq. Inimi isersimanerani suliassaq *A*-mut neqeroorutit atuarneqarput, taakkunungalu *Entrepreneur Z*-ip neqeroorutaa ilaavoq. Suliariumannittussarsiuussinerup naammassinerani neqeroorutit qaleriit tiguai, allaffimminullu toqqaannartumik iserluni. Aatsaat allaffiminiilluni malugilerpaa *Entrepreneur Z*-ip neqeroorutaanut aamma suliassanut allanut neqeroorutit ilaasut. Najooqutassat ataatsimut kakkigussaapput, kisiannili quppernerit qassiunersut eqqaamanngilaa. Neqeroorut tamarmiusoq 1 cm-it missaanik issussuseqarpoq. Tunniussassat tamarmiupput, kisiannili atuarneqarsimanatik. *JCP-p Entrepreneur Z*-imit neqeroorut qupperarsimanera eqqaamasinnaanngilaa. Najooqutassat *Siunnersorti R*-imut nassiunneqartussaanerat eqqarsaatigalugu assilineqarput. Tamatuma kingorna pisut ingerlanerat pillugu *JCP* oqaloqatigisimanngilaa. Aamma neqerooruteqartut allat *Entrepreneur Z*-ip neqeroorutaata tamakkiisumik atuarneqarsimannginnera pillugu immikkoortillugit nalunaarfigisimanngilai, taamaallaalli suliariumannittussarsiuussinerup imaqarniliornera nassiussuussimavaa, tassanilu allassimavoq *Entrepreneur Z* suliassanut tamanut neqerooruteqarsimasoq. Neqeroorutit nalliiiffigineqarnissaat eqqarsaatigalugu *JW* inassuteqaatinik suliaqartussasimavoq. Taanna inassuteqaatinik arlalinnik nassiussivoq. Kisiannili paasininnera malillugu maalaaruteqartup neqeroorutaa piumasaqaatinut naapertuussimanngilaq, "NEQEROORUTEQARNERMUT ALLATTUIFFIK A" eqqortumik immersorne-

qarsimangimmat. Kisiannili ilisimasimavaa, neqerooruteqartitsinermut najoqqutassat kukkuneqartut amigaateqarlutillu, taamatullu suliariumannittussarsiuussineq equngasumik ingerlanneqarsimasoq. Tamanna pissutigalugu suliariumannittussarsiuussinermi inatsisit malinneqarsimanersut eqqartuussissuserisumit naliliiffigineqarnissaa kissaatigisimavaa. Tamanna qangarpiaq pinersoq eqqaamanginnerarpaa. Eqqartuussissuserisoq *NHD* maalaarutigineqartup aalajangersimasumik eqqartuussissuserisorimmagu attaveqarfigineqarpoq. Akileraartarnermut Aqutsisoqarfimmiit nalunaarummut tunngatillugu qullersaminit, *JK*-mit, ilisimatinnearpoq, neqerooruteqartut pisortanut akiitsulli akileraanissamut isumaqatigiissuteqarsimasut akuerineqartarnerat nalinginnaasuusoq.

JCP, siornatigut maalaarutigineqartumi atorfeqarsimasoq, maannali so-raarninggorsimasoq, ilaatigut nassuiaavoq, 28. februar 2012-imi suliariumannittussarsiuussinermi isumaginnittuusimalluni. Matut matuneqarnerisa kingorna erngerluni allakkat neqeroorutiniq imaqartut puui tamaasa ammartersimavai, taamaalillunilu arlaannaalluunniit neqeroorutiniq tunuartitsinissaa periarfissaqassanngimmat. Neqeroorutit ammarneqartut puuisa iluaniitiinnarlugit qaleriillugit ilineqarput. Tamatuma kingorna neqeroorutit atuarlugit aallartippoq. Neqeroorutit suliassanut agguarlugit tulleriillugit atuarneqarput. Tassalu suliassaq A-mut neqeroorutit suilliullutik atuarneqarput, suliassaq B-mut neqeroorutit tulluunneqarlutik il.il. Eqqaamasai malillugit suleqataa *MMP*, suliariumannittussarsiuussinermik isumaginnittussaagaluartoq, atuaanerup naam-massilernerani, kisiannili neqerooruteqartut najuuttut suli aninngitsut inimut suliariumannittussarsiuussiviusumut iserpoq. Isumaqarpoq taanna inimut isermat nammineerluni erngerluni anisimalluni. *Entrepreneur Z*-ip neqeroorutaanut tunngatillugu eqqaamangilaa allakkat puuat malinnaatinneqarsimansoq, kisiannili pappiaqqat ataatsimoortut qaleriupput. Suliariumannittussarsiuussinerni nalinginnaasuusarpoq, aammalu amerlasuut peqataaffigisarsimavai, neqeroorummik atuaanermi tunuarsimaarfeqartoqarnersoq misissorneqartarluni, kiisalu neqeroorutip immikkoortui nalinginnaasumik atuarneqarneq ajorput. Eqqaamalluungilaa *Entrepreneur Z*-ip neqeroorutaa suliassanut arlalinnut neqeroorutiniq imaqarnersoq, aammalu taakku atuarneqarnerisut, isumaqarporli taamaalortoqarsimasoq. Kiisalu eqqaamangilaa, *Entrepreneur Z*-ip neqeroorutaani suliassat ataasiakkaat immikkut neqeroorfigineqarsimanersut, imaluunniit suliassanut tamanut ataatsimut neqeroortoqarsimanersoq, imaluunniit *Entrepreneur Z*-ip neqeroorutaani sanaartugassanut neqeroortoqarsimanersoq. Piffissaq suliariumannittussarsiuussiviusoq 15 – 20 minutsit missaannik sivi-sussuseqarsimavoq. Suliariumannittussarsiuussinerup ingerlanerani inimut matukkut kasuttortoqarpoq. Neqeroorut ataaseq inimut eqqunneqarpoq – paasi-narsivorlu neqeroorutip taassuma neqeroorut, neqeroorutit ammarneqareersut qaleriit akornanneereersoq assigigaa. Suliariumannittussarsiuussinermi neqeroorutit tiguneqareersut assigisa takkuttarnerat nalinginnaasuusarpoq, taamaalioornikkut neqerooruteqartut neqeroorutimik anngunnissaat qulakkeerni-artaramikku. Suliariumannittussarsiuussineq naammaat erngerluni neqeroorutit ataatsimoortillugit katersorneqarput, kisiannili suliariumannittussarsiuussinerup kingorna susoqarsimanersoq ilisimanginnerarpaa, tassani suliaq tigunginna-miuk. Ajortoqarsimasoq aatsaat qanittukkut eqqartuussissuserisumit *NHD*-mit siarnerfigineqarami paasisimavaa. Naak – suliariumannittussarsiuussinerni qanoq ittuniluunniit pisarnermisut – peqqissaarnerpaamik suliniarsimagaluarluni

takunngitsuugaqarsimasinnaanini oqaatigisinnaanngilaa. Taamaattumik allakkap puuata, *Entrepreneur Z*-ip neqeroorutaanik imallip neqeroorutinik arlalinnik imaqarsimasinnaanera ilimagineqarsinnaavoq, kisiannili neqeroorutaa qassinik qupperneqarsimanersoq oqaatigineqarsinnaanngilaq.

TB, maalaaruteqartumi atorfeqartoq, ilaatigut nassuiaavoq, suliariumannit-tussarsiuussinermut ornigussimalluni, aammalu neqeroorutit ammarneqarnissaat utaqqisimallugu. *MMP* allat ilagalugit inimi najuussimapput. Neqeroorutit ammarneqartut puuanniitillugit qalerinneqarput. *JCP* neqeroorutinik atuaasuuvoq. Nammineerluni neqeroorutit ammarneqartut isigisinnaasimavai, aammalu *Entrepreneur Z-imit* 'nunagissaanissamut suliassamut' neqeroorut kisimi atuarneqarpoq. Neqeroorutit atuarneqareermata *TB* ilisimatitsivoq, 'savalimmiormiut' kisimik sanaartugassanut/pequsiassanut neqerooruteqarsimasut. Suliariumannittussarsiuussinert amerlasuut najuuffigisarsimavai, kisiannili suliariumannittussarsiuussineq pineqartoq nalinginnaannginnerarpa.

Illuatungeriit saqqummiussaat

Piomasagaat 1 pillugu

Maalaaruteqartarfiup aalajangiinera 6. juni 2012-imeersoq aqcutigalugu aalajangiiffigineqarpoq.

Piomasagaatit 2 aamma 3 pillugit

Maalaaruteqartup pingaartumik erseqqissaatigaa, neqerooruteqartitsinermut allakkiami piffissaliussatut aalajangerneqartup, tassalu nal. 10.00 kingorna neqeroorummik tunniussinissaq akuerineqarsimammat tamanna neqerooruteqartarnermut inatsimmi § 14-imik aammalu neqerooruteqartarnermut inatsimmi § 7, imm. 3-mik, assigiimmik pineqarnissamut tunngavissamik unioqquitsinerusoq.

Entrepreneur Z-ip piffissaliussap taassuma naanissaa sioqqullugu taamaallaat suliassaq A-mut neqerooruteqarnera tunngavigineqartariaqarpoq. Tamanna *JCP*-p nassuiaanermi nalorninera pillugu maalaarutigineqartup *RH*-mut attaveqateqarnerata ilivitsuunnginneranit taparserneqarpoq, taamatullu *MMP*-p saqqummiussinera nalorninarloqarluni. *Entrepreneur Z*-ip neqeroorutaa suliariumannittussarsiuussinermi ilaatinneqarsimanersoq qulakkeerneqarsimanngippat, tamarmiutillugu ilaatinneqarnissaata akuerineqarnera issuagassanngortinneqassanngilaq, tamanna atornerluisinnaanermik ammaassisinnaammat. Taamaattumik *Entrepreneur Z*-ip suliassanut allanut neqeroorutaa, tassungalu ilanngullugu suliassanut tamanut ataatsimoortumik neqeroorutaa isiginiarneqarsinnaanngilaq.

Tamatuma saniatigut *Entrepreneur Z*-ip suliassanut tamanut neqeroorutaata ataatsimoortup ilaatinneqarnera neqerooruteqartarnermut inatsimmi § 7, imm. 3-mik aamma § 14-imik unioqquitsineruvoq, neqeroorut atuarneqarsimanngimmat. Maalaarutigineqartoq – maalaaruteqartumit aalajangersimasumut akerliiffigineqareerluni, tamannalu *Entrepreneur Z*-ip aallartitaanit akerliiffigineqanngitsaq – apeqqut pillugu immikkut isummiussaqqarpoq, aalajangiillunilu neqeroorut atuarneqassanngitsaq. *Entrepreneur Z*-ip neqeroorutaata atuarne-

qannginneranut kukkuneq maalaarutigineqartup tungaaniit utoqqatserfiusinnaasoq assigisaanilluunniit pineqarsinnaasoq tunngavigineqanngilaq. Neqeroorut taamaattoq, suliariumannittussarsiuussinermi neqerooruteqartitsisumit piaarluni atuarneqanngitsoortoq kingusinnerusukkut ilaatinneqarsinnaanngilaq. Neqeroorutit atuarneqanngitsoortut inimi suliariumannittussarsiuussiviusumi tigummineqartutut qulakkeerneqanngitsut – tassalu illussanik titartaasartup siunnersuisuusut taskianiittut – piffissaliussap iluani tiguneqarsimanersut qulakkeerluinnarneqarnissaannut tunngavissat, danskit Neqerooruteqartitsisarneq pillugu Maalaaruteqartarfiata aalajangiinerani, 12. april 2011-meersumi nassaassaasut, suliami matumani atorneqanngilluinnarput.

Maalaarutigineqartup tamatumunnga tunngatillugu ilaatigut oqaatigaa, *Entrepreneur Z-ip* neqeroorutai tamarmiusut Kommuneqarfik Sermersuumut tunniunneqarsimasut, aammalu suliariumannittussarsiuussinerup aallartinnerani inimi suliariumannittussarsiuussiviusumi najuutsitaqarsimasoq. *RH*-p 23. juli 2012-imi mail-erutaani uppersarsarneqarpoq, *Entrepreneur Z-ip* neqeroorutai tamarmiusut nal. 10.00 nallertinnagu allakkat puuinut matoqqasunut ikillugit tunniunneqarsimasut. Neqeroorummi immikkoortut atuarneqanngitsut atuarneqartunut ilaasimapput. Neqeroorutit tamarmiusut atuarneqarsimannginnerat kukkuneruvoq. Suliariumannittussarsiuussinermi ataatsimiinneq aaqqissuusaallarsimanngilaq, tamannalu tunngaviugunaruni kukkusoqarsimavoq, kisiannili suliariumannittussarsiuussilluni ataatsimiinnermi neqerooruteqartitsinermi inatsisit malinneqarnerat atuuttussaatinneqarnerallu eqqarsaatigalugit kukkusoqarsimanani. *Entrepreneur Z-ip* neqeroorutaasa tamarmik atuarneqarsimannginnerat neqerooruteqartarnermut inatsimmik unioqquitsinerugaluartoq, *Entrepreneur Z-ip* neqeroorutaasa atortussaanninnerinik tamanna kinguneqartussaannngilaq, aammalu suliap ingerlaqqinnerani tamanna eqqarsaatigineqarsinnaanngilaq eqqarsaatigineqartussaananilu. Neqeroorutit inimi suliariumannittussarsiuussiviusumiittut, kisiannili kukkunikkut atuanngitsoorneqartut ilaatinneqartarnerat ukiorpassuarni Danmarkimi ileqqorineqarpoq. Suliami matumani suliariumannittussarsiuussinerup kingunitsianngua tamanna paasineqarpoq, tassami *MMP*-p inimit suliariumannittussarsiuussiviusumiit allaffimminut toqqaannartumik isernermini neqeroorutit misissornerini tamanna paasisimammagu.

Piumasaqaatit 4-7 pillugit

Maalaaruteqartup tamatumunnga tunngatillugu ilaatigut oqaatigaa, agguaassinissamut allattuiffik 2-2-mi suliassatut allatorneqartut suliassaq A-mi neqerooruteqarnermut allattuiffimmut A-mut ilaatinneqartussaasut neqerooruteqartitsinermut najoqqutassami allassimasoq. Taamaattumik suliassaq A-mut neqeroorutit, agguaassinissamut allattuiffimmi 2-2-mi suliassanik taaneqartunik ilaatitsivunngitsut piumasaqaatinut naapertuuttutut isigineqarsinnaanngillat.

Kiisalu agguaassinissamut allattuiffik 2-2-mi suliassat suliassamut A-mut neqerooruteqartitsinermut ilaatinneqartussaanagerat ersernerlummat, maalaaruteqartup neqeroorutaanut agguaassinissamut allattuiffik 2-2-mi suliassatut taaneqartut neqeroorfigineqarneranni maalaaruteqartup neqeroorutaanut agguaassinissamut allattuiffimmi 2-2-mi suliassatut allassimasut ilaatinneqarnerat pissutigalugu maalaaruteqartup neqeroorutaa piumasaqaatinut naapertuutinnngitsutut isigineqarsinnaanngilaq. Kiisalu neqerooruteqarnermut allattuiffiit

qanoq immersorneqassanersut ilitersuummik ilaatitsisoqanngilaq, aammalu iluarsissutitut allakkiaq 1 arlalinnik kukkuneqarpoq, uppersaatissat tullerinnerat kukkuneqarpoq, taamatullu uppersaatissanik atorneqartussaangitsunik imaqarluni. Kukunerit amigaatillu taakku iluarsissutitut allakkiani kingulliusuni iluarsineqanngillat.

Agguaassinissamut allattuiffik 2-2-mi suliassat suliassaq A-mut ilaatinneqartussaangippata, maalaarutigineqartup neqeroorutininik nalilersuinermini maalaaruteqartup agguaassinissamut allattuiffimmi 2-2-mi suliassatut allattugai ilaatitussaangikkaluarpai. Maalaarutigineqartulluunniit periarfissaq taanna eqqarsaatigisimangilaa. Taamaalluni maalaaruteqartup suliassaq A-mut neqeroorutaa 1.031.000 koruuninik akikillineqarluni 6.743.000 koruuninik inerneqarpoq. Piumasaqaatinu immikkut ittuni immikkoortoq 3.1-imi periarfissaq taanna periarfissiisutigineqarpoq, tassani maalaarutigineqartoq suliassanik taakku-ninnga tamakkiisumik ilaannaasumilluunniit piiaanissamut imminut pisinnaatippoq.

Maalaaruteqartoq piumasaqaatinu naapertuuttumik appasinnerpaamik neqerooruteqarsimammata, tunniussinissamut aalajangerneq atorunnaarsinneqartussaagaluarpoq, tamatumunngalu taarsiullugu isumaqatigiissut maalaaruteqartumut tunniunneqartussaagaluarluni. Kisiannili *Entrepreneur Z* isumaqatigiissusiorfigineqarpoq suliassarlu aallartinneqarluni. Taamaattumillu maalaaruteqartoq naammassinninnissamut soqutigisaminu taarsiiffigineqarnissamut pisinnaatinneqarpoq.

Maalaarutigineqartup tamatumunnga tunngatillugu ilaatigut oqaatigaa, suliassaq A-mi qaartiterinissaq nunagissaanissarlu il.il. ilaatinneqartut neqerooruteqartitsinermut najoqqutassani naammaginatsumik ersarissusilimmik allasimasoq. Kisiannili suliassaq D-mi inissianu qulinu kuuffilerineq aammalu kuuffimmut pingaarnermut kuuffilerineq pineqarput. Neqerooruteqartup neqerooruteqarnermut allattuiffik immersorsimagaluarpagu tamanna piumasaqaatinu naapertuuttut isigineqarsimassagaluarpoq aalajangiusimaneqarpoq, tassalu kuuffik pingaarneq suliassatut ilivitsuusut inissimavoq, kukunerlu taanna iluarsissutitut allakkiamut 1-imut ilaatinneqarpoq. Neqerooruteqartut arlaannaataluunniit neqerooruteqarnermut allattuiffik taanna immersorsimangimmassuk, suliamik nalilersuinermini tamanna isumaqanngilaq. Kisiannili neqerooruteqartut tamarmik neqerooruteqartitsinermut najoqqutassat eqqortumik paasisimavaat, taamaallaat maalaaruteqartoq pinnani. Maalaaruteqartup neqeroorutaa piumasaqaatinu naapertuutinngilaq, tassani maalaaruteqartoq suliassanut inissianu qulinu tunngasunut neqerooruteqarsimavoq, tamatumalu saniatigut neqeroorummi tassani kuuffimmut pingaarnermut suliassanut tamarmiusunut, tassalu nunagissaanermut kuuffilerinermullu neqerooruteqarsimalluni. Tamanna pissutigalugu maalaaruteqartup neqeroorutaa itigartinneqarpoq. Aningaasartaliussat kukkusut neqeroorummiit ilanngaatigalugit piumasaqaatinu naleqqutinngitsut taakku ilanngaatigineqarsinnaanerat ajornarpoq. Aamma maalaaruteqartup neqeroorutaa allasimangilaq, kuuffimmi pingaarnermi kuuffilerineq ilanngaatigineqassappat neqeroorut atuuksinnarneqassanersoq. Maalaarutigineqartoq pos. 102-mi suliassanik tamakkiisumik ilaannaasumilluunniit piiaanissamut pisussaatinneqanngilaq. Neqerooruteqartitsinermut najoqqutassani

allassimagaluartoq, kuuffimmi pingaarnermi suliassanik tamakkiisumik ilaannaasumilluunniit piaanissamat sanatitsisoq imminut pisinnaatissinnaasoq, tassani suliassat taakku entreprenørimut allamut tunniunneqarsinnaanerat taaneqanngilaq. Pos. 102 peerneqarpat, tamanna aamma maalaarutigineqartup neqeroorutaata akikinnerulerneranik kinguneqartussaangilaq.

Piumasagaat 8 pillugu

Maalaaruteqartup tamatumunnga tunngatillugu ilaatigut oqaatigaa, maalaarutigineqartup neqerooruteqartarnermut inatsimmik unioqqutitsinermini taarsiissuteqartarnermut maleruagassat nalinginnaasut naapertorlugit maalaarutigineqartoq maalaaruteqartumut taarsiinissamat akisussaaffeqarfigilikkaminiq iliuseqarsimasoq.

Tassalu akisussaaffeqarnermut tunngaviusut pisariaqartinneqartut matumani pineqarput, tassami maalaarutigineqartup neqerooruteqartitsinermik aaqqissuussinermini ingerlatsinerminilu aammalu neqerooruteqartarnermut inatsimmi suleriaasissatut tunngavigineqartussatut aalajangersarneqartut naapertorlugit nalilersuinermi maleruagassat tunngaviusut unioqqutissimavai.

Kiisalu peqqutaasut ataqatigiinneri pisariaqartinneqartut matumani pineqarput. Maalaaruteqartup siumoorluni ilisimasimagaluaruniuk, maalaarutigineqartup neqerooruteqartitsineq nalilersuinerlu neqerooruteqartarnermut inatsimmi maleruagassat suleriaaserlu nalinginnaasoq uniorlugit ingerlanniarai, neqerooruteqarnissaq pinngitsoorsimassagaluarpa. Tassalu maalaaruteqartoq neqeroorummik suliaqarnissamat aningaasartuuteqarsimassanngikkaluarpoq. Neqerooruteqartut tamarmik, taakkunungalugu maalaaruteqartoq ilanngulluni, neqerooruteqartitsinerup neqerooruteqartarnermut inatsimmi maleruagassat malillugit, aammalu neqerooruteqartitsinermut allakkiami allassimasut naapertorlugit ingerlatsinissaat piumasagaataavoq.

Inatsisit malillugit naammassinninnissamat soqutigisanut taarsiissuteqartoqarnissaanik piumasaqarnermut tapertatut oqaatigineqarpoq, neqerooruteqartitsineq inatsisit malillugit eqqortumillu ingerlanneqarsimasuuppat maalaaruteqartup isumaqatigiissut pissarsiarisinnaagaluarpa. Neqeroorutit neqerooruteqartarnermut maleruagassat suleriaaserlu nalinginnaasoq malillugit suliarineqartussaanginnerat maalaaruteqartup siumoortumik eqqoriarisinnaasimangila. Tassalu neqerooruteqartarnermut inatsimmi maleruagassat unioqqutinneqarnerat akisussaaffeqalersitsisusnaanerat oqaatigineqarpoq. Taarsiissutissat naatsorsornerini piffissamat atorneqartumut, suliassani taamaattuni akiliggassanngortartunut nalinginnaasunut aammalu maalaaruteqartup Tunumi aallartinnermini siunissami niuerfimmi atugassaanut missiliukkat tunngavigineqarput.

Isumaqatigiissuteqarnissamat soqutigisanut sunniuteqarfiginerlunneqartunut taarsiissuteqarnissamat tunngatillugu oqaatigineqarpoq, maalaarutigineqartup akisussaaffiliisumik pissusilersornerata kingunerisaanik, maalaaruteqartoq neqeroorusiornermut aningaasartuutaanut tamaangaannartunut atatillugu aningaasartuutigisimasani taarsertinniarlugit piumasaqarsinnaasoq. Maalaaruteqartup nalunaquttap akunneri atorneqartut naatsorsorsimangilai. Tassalu

naatsorsuinermi suleqataasut akuusimasut piffissamik atuinerannut missiliugaat tamarmik immikkut tunngavigineqarput. Maalaaruteqartoq neqeroorummut tunniunneqartumut atatillugu sukumiisumik naatsorsuusiornissamut pisussaaffi-liigaanngilaq. Taamaattumik nalunaaquttap akunnerinut naatsorsuutininik suku-miisunik saqqummiussisinnaannginneq maalaaruteqartumut akornutaa-sinnaanngilaq. Kisiannili maalaaruteqartoq neqerooruteqartitsinerup suliarine-qarnera tamakkerlugu peqataasimammam, aammalu neqeroorutinik ilivitsunik tunniussisimammam, taamaalillunilu piffissamik atuisimammam akerlilerne-qarsinnaanngilaq.

Maalaarutigineqartup tamatumunnga tunngatillugu ilaatigut oqaatigaa, maalaaruteqartup nammineerluni neqeroorutaa piumasaqaatinut naapertuu-tinngitsoq, taamaattumillu maalaaruteqartoq taarsiiffigineqarnissamik angusa-qarsinnaanngitsoq, pingaartumik naammassinninnissamut soqutigisat eqqarsaa-tigalugit. Maalaaruteqartoq taarsiiffigineqassaguni tamatumani isumaqatigiissu-siornissamut soqutigisanut sunniuteqarnerluttut kisimik pineqassapput. Tamatu-munnga taarsiullugu neqerooruteqartitsinerup atorunnaarsinneqarnissaa pillugu *Entrepreneur Z*-imut isumaqatigiissuteqartoqarsinnaavoq. Maalaaruteqartup neqeroorutaa piumasaqaatinut naleqquttut isigineqassappat, neqeroorute-qartitsinermut najoqqutassat kukkusumik suliarineqarsimassapput, taamaa-llaallu atorunnaarsitsineq tamatumunnga iluaqutaasimasinaagaluarpog. Maalaa-riteqartoq suliassat arlaannaanniluunniit ajugaasinnaasutut isigineqanngimmat, maalaaruteqartup annerpaamik isumaqatigiissuteqarnermi soqutigisanut sunniu-teqarnerluttunut taarsiiffigineqarnissaq angusinnaavaa.

Naammassinninnissamut soqutigisat pitsaasumik angusaqarfiusinnaasut taarsiiffigineqarnissaannut naatsorsukkat eqqunngitsumik naatsorsorneqarsi-masutut uppersarsagaanngitsutullu akerliliiffigineqarput. Assersuutigalugu naammassinninnissamut soqutigisat pitsaasumik angusaqarfiusinnaasut annerpaamik suliassami sinneqartoortissatut naatsorsuutigineqartut amerlassu-seqarsinnaapput. Matussutissat nalinginnaasumik neqeroorutigineqartup aningaasartaasa 8-miit 10%-imut amerlassuseqartarput, suliamilu matumani annikinnerussapput, maalaaruteqartoq aatsaat siullermeerluni Tunumi aallartitsi-sussaammat.

Isumaqatigiissuteqarnissamut soqutigisani amigartoorutissat naatsorsorne-qarneri matumani qaffasippallaartutut kukkusumillu naatsorsorneqartutut akerli-lerneqarput. Naatsorsukkat uppersarsarneqanngillat akerlilerneqarlutillu.

Piumasaqaatit 9 aamma 10 pillugit

Maalaaruteqartup ilaatigut oqaatigaa, *Entrepreneur Z* neqeroorummut ilaatillugu ingerlatseqatigiiffik pisortanut akiitsunik akiligassanngortinneqarsimasunik akili-gassaqaanngitsoq pillugu akileraartarnermut oqartussaasunit nalunaarummik nalinginnaasumik uppersarsaatinilluunniit taamaaqataanik tunniussisimanngit-soq, taamaattumillu neqeroorut piumasaqaatinut naleqqutinngereersog. Kalaallit Nunaanni suleriaaseq aalajangersimasog, aammalu akiitsullit pisortat neqeroo-riteqartitsineranni peqataasinnaanissaannut killiliisarneq pillugu danskit inatsisi-tut nalunaarutaannut nr. 336-imut, 1997-imeersumut assingusog naapertorlugu neqerooruteqartup *Entrepreneur Z*-itit pisortanut annertuumik akiitsogartup,

ilaatinnegarnissaa ajornarpoq. Danskít inatsisaat malillugu neqerooruteqartup pisortanut 100.000 koruunit sinnerlugit akiitsoqartup neqeroorutaa taamaallaat ilaatinnegarsinnaavoq, neqerooruteqartoq píffissaalluarallartillugu akiliisitsiniartarnermi oqartussaasunut akilersuinissamut isumaqatigiissuteqarsimappat, isumaqatigiissullu malinnegarsimappat. *Entreprenør Z* taamatut pisimangilaq.

Maalaarutigineqartup tamatumunnga tunngatillugu ilaatigut oqaatigaa, neqerooruteqartitsinermit allagarsiussaq aningaasaqarnikkut pisinnaasanut imaqanngitsoq, taamaattumillu maalaarutigineqartup neqerooruteqartarnermit inatsimmi § 11 naapertorlugu neqeroorutinik tigusaminik nalilersuinermini píssutsit tassunga tunngasut eqqarsaatigissallugit pisinnaatitaaffiginngikkaa píssaaffiginaguluunniit. Tamatuma saniatigut *Entreprenør Z-ip* pisortanut akilersuinissamut isumaqatigiissuteqarsimaneranut, isumaqatigiissutillu taassuma malinnegarsimaneranut uppersaataat neqeroorummut ilanngullugu saqqummiussimavaa. Neqerooruteqartup pisortanut akiitsoqannginnissaanut píumasaqaammi suna tunngavigineqarnersoq, maalaarutigineqartup nalilersuinermini ilaatissanerlugu nammineerluni aalajangertussaavaa. Tassalu danskít inatsisaannut assingusumik suliaqartoqarsinnaangilaq, kalaallinorpiaq inatsimmi, tassalu pisortanut akiitsunik akiliisitsiniartarneq pinaveersaartitsinerlu píllugu Inatsisartut inatsisaanni nr. 3-mi, 2. maj 1996-imeersumi, kingusinnerusukkut allannguuteqartinneqartumi, § 7-imi allassimasut naapertorlugit kommunit namminneerluni naliliiffigisussaavaat, akileraarutinut akitsuutinullu akiitsut akilerneqanngitsut eqqarsaatigissanerlugit.

Piumasagaat 11 píllugu

Maalaaruteqartup ilaatigut tunngavigaa, maalaarutigineqartup neqerooruteqartitsinermi naliliinermilu inatsilerinermi siunnersorti *Eqqartuussissuserivimmi MHD*-meersoq, aammattaaq *Entreprenør Z*-imut aalangersimasumik eqqartuussissuserisutut atuuttoq atorreqarsimammat. Tassalu taanna aamma neqeroorutit naliliiffiqarnerini oqartussaasunit suliakkiisussanit siunnersortitut atorreqarsimappat, suliamut attuumassuteqartutut atorsinnaasussaangikkaluarpoq. Tassalu maalaarutigineqartup neqerooruteqartitsinerup píareersarnerani ingerlanneranilu § 7, imm. 3 naapertorlugu assigiinngisitsisoqannginnissaa qulakkeeqqaarsimangilaa.

Maalaarutigineqartup tamatumunnga tunngatillugu ilaatigut oqaatigaa, taamaanneraaneq uppersaataissaqanngitsoq. Eqqartuussissuserinermit maleruagassani oqaatigineqarpoq, eqqartuussissuserisup suliami sullitaq imaluunniit sionatigut suliami allami sullitaasimasoq, suiat imminnut atasuppata, aammalu paasissutissat suliami ataatsimi eqqartuussissuserisup tigusimasai allanut oqaatigineqarnissaat ilimanaateqarpat, tamannalu suliap aappaanut sunniuteqarsinnaappat, soqutigisat imminnut aporaassinnaasut. *Eqqartuussissuserisoqarfiup MHD*-p neqerooruteqarnermit atatillugu *Entreprenør Z* sullissimangilaa, imaluunniit suliamut matumunnga sulianulluunniit allanut atatillugu toqqaannartumik toqqaannangitsumilluunniit sunniuteqarsinnaasumik *Entreprenør Z* sullissimanagu.

Maalaaruteqartarfiup oqaaseqaataa:

Piomasagaat 2 pillugu

Maalaarutigineqartumi Sanaartornermut Avatangiisinullu Ingerlatsivimmi suliniuteqarnermut pisortamut *MMP*-p nassuiaaneratul *Entreprenør Z*-ip neqeroorutaa suliariumannittussarsiuussineq tamakkerlugu neqeroorutit qaleriit inimi suliariumannittussarsiuuffiusumiittut, aammalu inimit suliariumannittussarsiuussivimmiit allaffimminut toqqaannartumik eqqussimasaminiittut akornanniissimanerat, tamannalu suliariumannittussarsiuussinerup naammassinerata kinguninngua allaffimminiilluni malugilersimagaa Maalaaruteqartarfiup aalajangiinerminut tunngavigaa. Nassuiaatini allani imaluunniit pisuni allani nassuiaatinik, taamatut nassuiaateqarnermut uniuinissamut tunngaviliisunik soqanngilaq. Taamaattumik *Entreprenør Z*-ip neqeroorutai tamarmiusut neqerooruteqartitsinissamut allakkiami piffissaliussap iluani tiguneqarsimapput.

Tamatuma kingunerisaanik maalaaruteqartup piomasagaataa malinneqanngilaq.

Piomasagaat 3 pillugu

Entreprenør Z-ip neqeroorutaa suliariumannittussarsiuussinermi atuarneqarsimangimmat assortoneqanngilaq. Tamanna neqerooruteqartarnermut inatsimmi § 14-ip immikkoortuanik siullermik unioqqutitsineruvoq, tassani suliassanut immikkoortunut tamanut *Entreprenør Z*-imit neqeroorutininik tigusaqartoqarsimasoq neqerooruteqartut suliariumannittussarsiuussinermi imaqarniliani ilisimatinneqarsimagaluartut apeqqutaatinngu.

Neqeroorutininik ammaasarnermi atuaasarnermilu pisortanut isumaqatigiissutinut neqerooruteqartitsinerit tunniussisarnerrillu ersarinnerulernissaat siunertarinqarpoq. Kisiannili neqeroorut inimi suliariumannittussarsiuussiviusumiippat, aammalu piffissaliussatut aalajangerneqartup iluani tiguneqarsimappat neqeroorutininik ilivitsuusunik atuaangitsoornikkut neqerooruteqartarnermut inatsimmi § 14-ip immikkoortuanik siullermik unioqqutitsineq neqerooruteqartut allat asigiinngisinneqarnerininik kinguneqartussaangilaq, imaluunniit neqerooruteqartunik toqquartuinerminu tunngavissat piviusorsioortumik, kinaassusersiunngitsumik assigiinngisitsiviunngitsumillu pineqarnerininik kinguneqartusnaanani. Taamaattumik neqerooruteqartarnermut inatsimmi § 7, imm. 3 unioqqutinneqarsimangilaq.

Taamaattumik maalaaruteqartarfik isumaqarpoq, neqerooruteqartarnermut inatsimmi § 14-imik unioqqutitsineq ima annertutigisutut oqaatineqarsinnaangilaq, allaat *Entreprenør Z*-ip neqeroorutaa ilaatinneqartariaqanngitsutut isigineqarsinnaalluni.

Tamatuma kingunerisaanik maalaaruteqartup piomasagaataa malinneqanngilaq.

Piomasagaat 4 pillugu

Neqerooruteqartut, "Suliassaq A – sanaartorfissagissaanermut betonilerinermullu akiusut"-nut neqerooruteqarnissamik kissaateqartut "Suliassaq A pillugu NEQEROORUTEQARNERMUT ALLATTUIFFIK A – Nunagissaaneq betonilerinerlu, 25. januar 2012-imi iluarsaanneqartoq aammalu iluarsisutitut allakkiaq

1-itut nassiussuunneqartoq atortussaagaat Maalaaruteqartarfimmit tunngavigineqarpoq.

Iluarsiissutitut allakkiap kukkusumik "NEQEROORUTEQARNERMUT ALLATTUIFFIK suliassaq A", "Tasiilami inissianut qulinut kuuffik pingaarneq"-mi suliassanut pingaarnernut, nunagissaanermut kuuffilerinermullu atuuttoq imarigaluaraa, arlaannaataluunniit neqerooruteqarnermut allattuiffik taanna immersorsimangilaa. Tamatuma saniatigut neqerooruteqarusussinnaasut arlaannaalluunniit maalaarutigineqartumut saaffiginnissimangilaq, neqerooruteqarnermut allattuiffik kukkusoq taanna neqerooruteqarnermut najoqqutassianut ilaatinneqassanersoq paasinialugu.

Neqerooruteqarnermut allattuiffiup taassuma kukkusumik iluarsiissutitut allakkiamut 1-imut ilanngunneqarsimaneranut aamma iluarsiissutitut allakkiap suliassamut A-mut ilusiliussamik nutaamik atuisoqarneranut, aammalu suliassaq A-p nunagissaanermut betonilerinermullu tunngajunnaarneranik, kisiannili suliassap pingaarnernup nunagissaanermut kuuffilerinermullu tunngalerneranut innersuussummik imaqarneranut innersuussummik imaqannginneranit taperserneqarpoq. Tamatuma saniatigut iluarsiissutitut allakkiap taamaallat "NEQEROORUTEQARNERMUT ALLATTUIFFIK A"-p iluarsaanneqarsimaneranut innersuussummik imaqarpoq, tassanilu pineqartoq tassaavoq "NEQEROORUTEQARNERMUT ALLATTUIFFIK A", 25. januar 2012-imeersoq, aammalu agguaassinermut allattuiffik tunngavigalugu nassiussuunneqarsimasoq.

"NEQEROORUTEQARNERMUT ALLATTUIFFIK A"-p qulequtaani ersarissumik allasimavoq, taanna taamaallaat nunagissaanermut tunngasuusoq, kuuffilerinermut tunngasuunani. Piumasaqaatini Immikkut Ittuni imm. 3.1-imi suliassaq A pineqarpoq. Tassani allasimavoq, inissianut quliusunut kuuffimmullu pingaarnermut tunngatillugu qaartiterinerit, assaanerit nunagissaanerillu kisimik pineqartut. Piumasaqaatini Immikkut Ittuni Sulinissamut Nassuiaatit Immikkut Ittut I, immikkoortoq 03 aamma Sulinissamut Nassuiaatit Immikkut Ittut II, immikkoortoq 02 innersuunneqarput. Immikkoortut marluusut taakku acquersuutitut assaanermut, nunamik qaartiterinermut kiisalu nunagissaanermut issulerinermullu tunngasuupput. Kisiannili immikkoortuni taaneqartut arlaannaalluunniit kuuffilerinissamut innersuusutitik imaqanngillat.

Agguaassinermut allattuiffik 1-1 imatut qulequtaqarpoq: "Nunalerineq, acquersuutit (SA-II immikkoortoq 1-3), Tasiilami inissianut qulinut kuuffik pingaarneq". Tassalu agguaassinermut allattuiffiup suliassamut A-mut tunnganerata saniatigut allatut isummissalluni tunngavissaqanngilaq, tamatumani agguaassinermut allattuiffimmi "NEQEROORUTEQARNERMUT ALLATTUIFFIK A"-mut ersarissumik innersuusisoqanngikkaluartoq. Aningaasat agguaassinermut allattuiffik 1-1-imi taaneqartut agguaassinermut allattuiffiup imaata agguaassinermut allattuiffimmut A-mut atatinneqarnissaa eqqarsaatigalugu "NEQEROORUTEQARNERMUT ALLATTUIFFIK A"-mi pos. 102-mut tunngasumi imm. 2-mut nuunneqassasut ilimagineqartariaqarpoq.

Agguaassinermut allattuiffik 2-2 imatut qulequtaqarpoq: Kuuffilerineq (SA-II immikkoortoq 1-3-mi inissianut qulinut kuuffik pingaarneq". Agguaassinermut

allattuiffik assersuutigalugu pitsaassutsimik qulakkeerinermit tunngasuvoq, tassunga TV-kkut videoliorluni misissuineq ilaatinneqarluni. Immikkoortoq taanna aamma Sulinissamut Nassuiaatit Immikkut Ittut II, immikkoortoq 03-mi kuuffilerinerup annertussusissaanut nassuiaammi nassaarineqarsinnaavoq. Piumasaqaatini Immikkut Ittuni imm. 3.5-imi, immikkoortup "402 Kuuffimmi pingaarnerrinnarmi kuuffilerineq"-up ataani Suliassaq D – VVS-ilerineq-mut tunngasumut innersuussisoqarpoq.

Agguaassinermit allattuiffinni 1-1-imi aamma 2-2-mi qulequtaannaat "NEQEROORUTEQARNERMUT ALLATTUIFFIK A"-p qulequtaanut atatinneqarnerat innersuussutigalugit, agguaassinermit allattuiffik 2-2-p "NEQEROORUTEQARNERMUT ALLATTUIFFIK A"-p immersorneqarneranut atorneqartussaanginnerata ersarinnera tunngavilersuutigineqartariaqarpoq. Piumasaqaatini Immikkut Ittuni suliassanut A-mut aamma D-mut nassuiaatit, taakkunanilu Sulinissamut Nassuiaatini Immikkut Ittuni immikkoortunut attuumassuteqartunut innersuussutit agguaanermut allattuiffinni 1-1-p aamma 2-2-p imaanut ataqatigissinnerini agguaanermut allattuiffiup 2-2-p "NEQEROORUTEQARNERMUT ALLATTUIFFIK A"-p immersorneqarneranut atorneqartussaanginnera erseqqissarneqarsimasutut isigineqartariaqarpoq.

Taamaattumik *Entrepreneur Z*-ip suliassaq A-mut neqeroorutaa piumasaqaatinut naapertuutinngilaq, tamatumalu kingunerisaanik maalaaruteqartup piumasaqaataa malinneqanngilaq.

Piumasaqaat 5 pillugu

Matuma siuliani piumasaqaatip 4-p ataani nassuiarneqartut agguaassinermit allattuiffik 2-2 suliassamut A-mut neqeroorummut ilaasussaangilaq. Taamatuttaaq piumasaqaat 4-p ataani tunngavilersuutigineqartut innersuussutigalugit, iluarsissutitut allakkiamut, imaluunniit neqerooruteqartitsinermit najoqqutassat sinnerinut neqerooruteqarnermit allattuiffimmik kukkusumik ilanngussisoqarsimanera eqqarsaatalugu takuneqarsinnaangilaq, ersernerluutit taamaattut maalaaruteqartup agguaassinermit allattuiffiup 2-2-p "NEQEROORUTEQARNERMUT ALLATTUIFFIK A"-p immersornerinut ilaatinneqarnissaanut isumaqarnissamut naammaginatunuk tunngavissaqarneranut tunngavissiisinnaasut.

Tassalu maalaaruteqartup neqeroorutaa piumasaqaatinut naapertuutinngilaq.

Tamatuma kingunerisaanik maalaaruteqartup piumasaqaataa malinneqanngilaq.

Piumasaqaat 6 pillugu

Maalaaruteqartarfik isumaqarpoq, matuma siuliani piumasaqaatini 4-mi aamma 5-imi taaneqartut neqerooruteqartitsinermit najoqqutassani oqaasertaliussat ersernerluttut paatsoornartutuluunniit isumaqarfigineqarnerat, taamaalillunilu agguaassinermit allattuiffik 2-2 "Neqerooruteqarnermit ALLATTUIFFIK A"-p immersorneqarneranut ilaatinneqassanersoq pillugu paatsoortoqarsinnaaneranut tunngavissaqartut isumaqarfigineqanngitsut.

Neqerooruteqartitsinermit najoqqutassani, tassungalu "NEQEROORUTEQARNERMUT ALLATTUIFFIK suliassaq A" kukkusooq, aammalu neqeroorute-

qarnermut allattuiffiup taassuma ilanngunneqarnerani kingusinnerusukkut malinnaatitsinnginneq, iluarsiiissutitut allakkiap 1-ip pitsaanngitsumik ilusiligaa-nera, imaluunniit iluarsiiissutitut allakkiap nassiunneqarnerata kingorna aggu-aassinissamut allattuiffiit siusinnerusukkut nassiussuunneqarsimasut kingunerisassanut iluarsineqannginnerat ilanngullugit, allatut inerneqartitsinissamik kinguneqarsinnaanngillat. Tamatuma saniatigut maalaarutigineqartoq neqerooruteqarnermut allattuiffiit qanoq immersorneqassanersut ilitsersuummik ilanngussinissamut pisussaaffeqartutut isigineqarsinnaanngilaq. Neqerooruteqartoq neqerooruteqarnissamut najoqqutassanik paasinninnissamik ajornartorsiuteqaruni, tamanna pillugu neqerooruteqartitsisumut apeqquteqarsinnaavoq. Maalaaruteqartoq, imaluunniit neqerooruteqarsinnaasut allat "NEQEROORUTEQARNERMUT ALLATTUIFFIK A"-mut agguaassinermullu allattuiffiit pillugit apeqquteqarnissamut tunngavissarsisimangillat.

Aammattaaq maalaarutigineqartup agguaassinissamut allattuiffiup 2-2-p, maalaaruteqartup neqeroorutaaneersup ilanngunneqartup aningaasartaanik ilanngaannissamut pisussaaffeqarnerarneqarnera Maalaaruteqartarfimmit akuerineqarsinnaanngilaq. Neqeroorutip piumasaqaatinut naapertuunnissaa neqerooruteqartup akisussaaffigaa. Neqeroorut piumasaqaatinut naapertuutinnigippat maalaarutigineqartoq pisinnaatitaavoq neqeroorut itigartissallugu, akuttunngitsumillu aamma pisussaataitaasarluni.

Maalaaruteqartup neqeroorutaa annikillineqassappat, maalaarutigineqartup neqeroorut annikillisinneqarsinnaanersoq imaluunniit annikillititsinerup kingorna maalaaruteqartup neqeroorut atuutsinnarniarneraa pillugu paasiniaalluni maalaaruteqartumut attaveqarnissaa innersuussutigineqartussaavoq. Piffissap neqerooruteqarfiusup naanerata kingorna maalaaruteqartup saaffiginnissutai assigiimmik pineqarnissamut tunngavissanik saneqqutsinermik kinguneqartussaapput, tassani maalaaruteqartoq neqeroorutiminik iluarsiinissamut periarfissinneqarsinnaammat.

Tamanna tunngavigalugu, aammalu piumasaqaatinut naapertuuttumik iliornissaq eqqarsaatigalugu, matumanilu piumasaqaatinut naapertuuttunik neqerooruteqartoqarsimammat, maalaarutigineqartoq pisinnaatitaavoq maalaaruteqartup neqeroorutaa itigartissallugu, matumani ersarissumik kukkusoqarsimanagera tunngavigineqarsimagaluarpalluunniit. Maalaarutigineqartup pos. 102-miit suliassanik tamakkiisumik ilaannaasumilluunniit paaasinnaanermut imminut periarfississimanagera allatut angusaqarnissamik kinguneqarsinnaanngilaq.

Tamatuma kingunerisaanik maalaaruteqartup piumasaqaataa malinneqanngilaq.

Piumasaqaatit 9 aamma 10 pillugit

Maalaarutigineqartoq Piumasaqaatini Immikkut Ittuni imm. 5.7.5-imi allappoq, suliassamut ilaatinneqarnissamut neqerooruteqartup pisortanut akiliggassanngortinneqarsimasunik akiitsoqannginnera pillugu akileraaruseriffimmiit nalunaarut atorlugu uppernarsaasinnaanissaa piumasarineqartoq.

Piumasaqaat taanna neqerooruteqartitsinermut allagarsiussami allassi-manngilaq. Neqerooruteqartarnermut inatsimmi § 11-mi allassimavoq, teknik-

kikkut aningaasaqarnikkullu pisinnaasat pillugit paasissutissiinissamut piunasaqaat neqerooruteqartitsinermit allagarsiussami takuneqarsinnaasussaasoq. Pisortanut akiitsut pillugit paasissutissat neqerooruteqartup inuttut atugaanut tunngasuvoq, aammalu neqerooruteqartup teknikkikkut aningaasaqarnikkulluunniit pisinnaasaanut tunngasuunani. Tassalu aamma pisortanut akiitsut aalajangersakkamut nassuiaatini taaneqanngillat. Tassani allassimavoq, aningaasaqarnikkut piginnaasat pillugit paasissutissat tassaasinnaasut aningaaseriviup nalunaarutai aamma/imaluunniit inuussutissarsiornermi akisussanermit sillimasiissutinut attuumassuteqartunut, ukiumoortumik nalunaarutinut oqimaaqatigiissitsinernulluunniit uppersaatissaqarneq, imaluunniit kaavii-aartitanut tamarmiusunut nalunaarut. Inuttut atukkanut tunngasut nassuiaatini assersuussinermit ilaatinneqarnissaannut tunngavissaqartutut isumaqarfigneqanngilaq.

Uppersaatini saqqummiussinissamut piunasaqaateqarneq Piunasaqaatini Immikkut Ittuni ersarinnerusumik taaneqanngilaq. Pisortanut akiitsut akilinningsuukkat akilersinneqartarnerat pinaveersaartitsinerlu pillugit Inatsisartut inatsisaanni nr. 3-mi, 2. maj 1996-imeersumi, kingusinnerusukkat allannguuteqartinneqartumi § 7-imi danskit inatsisaanni, maalaaruteqartup tunngavigisaani allassimasut paarlattuanik maleruagassanik aalajangersaasoqarpoq, neqerooruteqartoq pisortanut akiitsoqarpat, neqeroorut ilaatissallugu oqartussaasut pisussaaffilerneqanngitsut. Oqartussaasut neqerooruteqartumut taamaattumut qanoq isummissanerlutik, oqartussaasut ataasiakkaat namminneerlutik aalajangissavaat.

Entrepreneur Z-p neqerooruteqarnerminut atatillugu akilersuinissamik isumaqatigiissuteqartoqarsimanera pillugu Akileraartarnermit Aqutsisoqarfimmit nalunaarummik ilanngussaqqarpoq. *Entrepreneur Z-p* piffissami suliariumannit-tussarsiuussiffiusumi akiitsunut akiligassaq siulleq akilersimavaa. Tamatuma kingorna qitiusumik oqartussaasup, tassalu Akileraartarnermit Aqutsisoqarfiup, *Entrepreneur Z-ip* akilersuinissamut isumaqatigiissut malinneraa qulakkeersimassagaa eqqarsaatigineqartariaqarpoq. Tassalu *Entrepreneur Z* pisortanut akiligassanngortunik akiitsoqarsimanngilaq. Tamanna pissutigalugu Piunasaqaatini Immikkut Ittuni imm. 5.7.5-imi piunasaqaatinik naammassinnissimanermit nalunaarutip, *Entrepreneur Z-p* ilanngussimasaata atunngitsoortinnissaanut tunngavissaqanngitsutut isigineqarpoq.

Tamatuma kingunerisaanik maalaaruteqartup piunasaqaataa malinneqanngilaq.

Piunasaqaat 11 pillugu

Eqqartuussissuserisoqarfik MHD siusinnerusukkat pisuni ataasiakkaani ingerlatseqatigiiffimmi sullissinermit inatsisinut nalinginnaasunut atatillugu *Entrepreneur Z-imut* sullissisarsimavoq. Eqqartuussissuserisoqarfiup suliariumannit-tussarsiuussineq sioqqullugu neqerooruteqartumut sullissisimanersoq, tamatumaluunniit kingorna allatut *Entrepreneur Z-imut* ikiuussimanersoq takuneqarsinnaanngilaq. Ilisimatitsissutigineqartut malillugit eqqartuussissuserisoqarfik maalaarutigineqartup aalajangersimasumik eqqartuussissuserisora, taamaallaallu neqerooruteqartitsinermit najoqqutassanik suliallu ingerlaneramik nalilleeqqullugu maalaarutigineqartup suliniuteqarneratigut qinnuigineqarsima-

voq, maalaarutigineqartup najoqqutassani suliallu ingerlanerani amigaatit takusinnaareeramigit naliliisoqarnissaa kissaatigigamiuk. Eqqartuussissuserisoqarfik, taassumalu ataani eqqartuussissuserisoq *NHD* suliassap neqeroortup arlaannut aalajangiinerpiamut peqataasimanerarneqarneranut tunngavissaqanngilaq, taamatullu suliassaq neqerooruteqartarnermut inatsit taassumalu tunngavissatut tunuliaqutai malillugit tunniunneqarsimasutut isigineqarpoq.

Tamatuma kingunerisaanik maalaaruteqartup piomasagaataa malinneqanngilaq.

Piomasagaatit 7 aamma 8 pillugit

Piomasagaatini 2-6-imi aamma 9-11-mi Maalaaruteqartarfiup aalajangiinera eqqarsaatigalugu, maalaaruteqartup piomasagaataa malinneqanngilaq.

Tamatuma kingunerisaanik aalajangerneqarpoq:

Maalaarutigineqartoq piomasagaatini 2-mi aamma 4-11-mi pinngitsuutinneqarpoq.

Piomasagaat 3 pillugu

Maalaarutigineqartoq neqerooruteqartarnermut inatsimmi § 14-ip immikkoortuanik siullermik unioqqutitsilluni iliuuseqarsimavoq, kisiannili maalaaruteqartup piomasagaataani pinngitsuutinneqarluni.

Maalaarutigineqartoq suliame aningaasartuutunik maalaaruteqartumut akiliissanngilaq.

Maalaaruteqarnermut akiligassaq utertinneqassanngilaq.

Thomas Trier Hansen
Siulittaasoq

— — — — —

Atsiornerup eqqortuunera uppersarneqarpoq.

Neqerooruteqartitsisarnermut Maalaaruteqartarfiup, ulloq 7. september 2012.

Janus Køster
Neqerooruteqartitsisarnermut Maalaaruteqartarfiup allattaa